



輿地廣記 附札記

二



A decorative border with a cloud and horse motif at the top. The border consists of a thick black line with intricate white patterns. At the top, there is a stylized illustration of a horse and a rider on a cloud. The rest of the border is filled with swirling, cloud-like patterns.

輿地廣記

附札記

(二)

歐陽忞撰

輿地廣記卷第八

京西南路

望襄州。春秋已來楚地。秦南郡之北界。二漢屬南陽南郡。魏置襄陽郡。晉因之。兼置荊州。東晉置雍州。宋文帝割荊州置雍州。襄陽去江陵步道五百。勢同唇齒。無襄陽則江陵受敵。自東晉庾翼爲荊州刺史。將謀北伐。遂鎮襄陽。齊梁皆因之。後梁蕭詧都此。西魏改曰襄州。隋開皇初郡廢。大業初州廢。復置襄陽郡。唐武德四年曰襄州。天寶元年曰襄陽郡。後爲山南東道節度。今縣六。

緊襄陽縣。二漢屬南郡。劉表爲荊州牧。鎮此。魏屬襄陽。爲重鎮。蜀將關羽攻沒于禁等兵。勢甚盛。徐晃屯守不下。曹公謂晃曰。全襄陽子之功也。後孫權帥兵向西。時曹仁鎮之。司馬懿曰。襄陽水陸之衝。禦寇要地。不可失也。晉因之。兼爲荊州刺史治。羊祜杜預皆鎮焉。東晉僑置雍州。宋齊梁皆因之。郡亦自宜。城徙治焉。後梁蕭詧都此。而爲西魏附庸。後周置襄州。隋開皇初郡廢。大業初復置。唐爲襄州。有峴山。羊祜與鄒湛等嘗登之。今墮淚碑在焉。有鹿門山。龐德公隱居之。所有望楚山。古馬鞍山也。晉劉弘山簡九日宴遊於此。武陵王愛其峯秀。改曰望楚山。

望鄧城縣。故鄧國。二漢爲鄧縣。屬南陽郡。晉曰鄧城。屬襄陽郡。其後廢入樊城。樊周仲山甫所封也。東漢建安中。關羽圍于禁於樊。後置樊城縣。後周省入安養。隋屬襄陽郡。唐屬襄州。天寶元年改安養曰臨

漢正元二十一年移治古鄧城。復改曰鄧城。有樊城鎮。

緊穀城縣。故穀國。二漢爲筑陽縣。屬南陽郡。晉屬順陽郡。其後廢焉。孝武置義城縣及義城郡。後周郡廢。隋開皇十八年改縣曰穀城。屬襄陽郡。唐屬襄州。

中下宜城縣。故鄢。楚之別都也。秦爲南郡之北部。漢惠帝三年改曰宜城。屬南郡。建安十三年魏武平荊州。分置襄陽郡。晉因之。宋曰華山縣。置華山郡。後魏改爲宜城郡。分華山置率道縣。西魏改華山縣曰漢南。後周郡廢。隋屬襄陽郡。唐屬襄州。正觀八年省漢南入率道。天寶七載改率道曰宜城。有黎丘城。後漢初秦豐阻兵於黎丘。卽此郡縣。故鄢國。春秋時自商密遷此。爲楚附庸。楚滅之。昭王畏吳。自鄢遷焉。後復還鄢。二漢及晉屬南郡。隋屬襄陽郡。唐改爲樂鄉。武德四年置都州。正觀八年州廢。屬襄州。周省入宜城。

中下中廬縣。故廬戎國。二漢爲中廬縣。屬南郡。晉屬襄陽。其後廢焉。梁置穰縣。西魏改爲義清。屬歸義郡。後周廢。隋屬襄陽郡。唐屬襄州。皇朝太平興國元年復改爲中廬。

中下南漳縣。本漢臨沮縣。屬南郡。晉屬襄陽郡。其後廢焉。西魏置重陽縣。後周改曰思安。隋開皇十八年改曰南漳。屬襄陽郡。唐屬襄州。武德二年析南漳置荆山。正觀八年省南漳入義清。開元十八年徙荆山于故南漳。禹貢荆山在東北。荆豫二州於是分境。楚卞和得玉之處。

上鄧州。本夏禹之國。春秋時申鄧二國之地。戰國屬韓。自後屬楚。秦置南陽郡。二漢因之。晉屬南陽國。及

順陽義陽二國之境。宋齊爲南陽郡。後魏兼置荊州。西魏爲重鎮。隋開皇初。改爲鄧州。大業初。州廢。復置南陽郡。唐武德二年。曰鄧州。天寶元年。曰南陽郡。梁升爲宣化軍節度。後唐改曰威勝。周改曰武勝。今縣五。

上穰縣。本楚別邑。秦取之。以封魏冉爲穰侯。後屬南陽郡。二漢因之。晉屬義陽郡。後魏爲南陽郡治。及荊州刺史治焉。隋開皇初。改爲鄧州。後爲南陽郡。唐復爲鄧州。二漢朝陽縣。屬南陽郡。晉屬義陽郡。其後廢焉。故城在今縣東南。二漢新野縣。屬南陽郡。晉置義陽郡。後曰棘陽。置新野郡。後周郡廢。隋開皇初。復改縣曰新野。屬南陽郡。唐乾元元年。省入穰。漢冠軍縣。本穰盧陽鄉。武帝以封霍去病。去病仍出征匈奴。功冠諸軍。故曰冠軍。屬南陽郡。後晉隋皆因之。唐正觀元年。省入臨瀨。漢涅陽縣。屬南縣郡。後漢及晉皆因之。隋開皇初。改曰課陽。唐正觀元年。省入穰。故臨瀨縣。本漢冠軍縣之北境。魏置新城縣。西魏改爲臨湍。隋開皇初。復名新城。屬南陽郡。唐屬鄧州。天寶元年。復名臨湍。漢改曰臨瀨。皇朝建隆初。省入穰。

中下南陽縣。故申國。戰國時。秦昭王以爲宛縣。置南陽郡。漢因之。王莽以宛爲南陽。後漢復爲宛。晉如之。後魏置上陌縣。後周併宛入焉。更名上宛。隋開皇初。改爲南陽郡。唐屬鄧州。博望鎮。漢博望縣也。武帝置以封張騫。屬南陽郡。後漢及晉皆因之。其後廢焉。安衆鎮。二漢安衆縣也。屬南陽郡。晉省之。漢杜衍縣。屬南陽郡。後漢省之。故城在今縣西。二漢育陽縣。屬南陽郡。晉因之。其後廢焉。故城在今縣南。漢雒

縣屬南陽郡。東漢及晉皆因之。元魏曰北雒。後省。卽陳倉人所逐二童子名寶鷄者。雄止陳倉爲石雌。止此縣。故名之。漢西鄂縣屬南陽郡。東漢及晉皆因之。元魏省入北雒。西魏向城縣及雒陽郡。隋開皇初郡廢。屬涇陽郡。唐屬鄠州。後省入南陽。

中下內鄉縣。本楚之白羽邑。春秋昭十八年許遷于白羽。後改爲析。漢屬弘農郡。後漢屬南陽郡。晉屬順陽郡。後曰西浙。置浙陽郡。後周改縣曰中鄉。省浙川入焉。隋改中鄉曰內鄉。屬浙陽郡。唐屬鄠州。菊潭鎮。本漢酈縣。屬南陽郡。後漢及晉皆因之。隋開皇初改爲菊潭縣。北有菊水。其旁悉生甘菊。水極甘馨。中有三十家不復穿井。仰飲此水。上壽至百二三十。唐屬鄠州。周省之。丹水鎮。漢丹水縣也。屬弘農郡。後漢屬南陽郡。晉屬順陽郡。後置丹川郡。後周郡廢。隋屬浙陽郡。其後廢焉。東有於村。張儀說楚絕齊。許以商於之地六百里。卽此。

中下浙川縣。本後漢南鄉縣。魏置南鄉郡。晉改爲順陽郡。後魏復爲南鄉郡。又分置浙川縣。後周省之。隋開皇初郡廢。大業初置浙陽郡。其後浙陽及南鄉縣皆廢焉。五代時復置浙川縣。屬鄠州。

中下順陽縣。漢屬南陽郡。哀帝改爲博山。晉屬順陽郡。西魏析置鄭縣。尋改爲清鄉。後周省順陽入焉。隋開皇初復改爲順陽。其後省入內鄉。爲鎮。皇朝太平興國六年升爲縣。

上隨州。春秋隨國。戰國屬楚。秦屬南陽郡。二漢因之。晉屬義陽郡。惠帝置隨郡。宋齊因之。西魏置并州。後改曰隨州。隋開皇初郡廢。大業初州廢。置漢東郡。唐武德三年曰隨州。天寶三年曰漢東郡。皇朝乾德五

年升崇義軍節度。太平興國元年改崇信軍。今縣三。

上隨縣。故隨國。左傳所謂漢東之國。隨爲大者也。其後楚滅之。以爲縣。二漢屬南陽郡。晉屬義陽郡。惠帝置隨郡。宋齊因之。西魏置隨州。隋置漢東郡。唐復爲隨州。光化鎮。本隨縣地。南齊分置安化縣。西魏改爲新化。後周改爲光化。隋屬漢東郡。唐屬隨州。皇朝熙寧元年省焉。有斷蛇丘。隋侯出而見大蛇。中斷。因舉而藥之。後蛇御明珠報德。故名。

中下唐城縣。故唐國。屬楚。漢爲上唐鄉。屬春陵縣。晉屬安昌縣。後置上唐縣。後魏曰厥西。置義陽郡。西魏改縣曰下澆。隋開皇初郡廢。十六年改縣曰唐城。屬漢東郡。其後省入棗陽。唐開元二十六年復置。屬隨州。梁改爲漢東。後唐復故。晉又改爲漢東。漢又復故。

中下棗陽縣。本二漢蔡陽縣。屬南陽郡。晉屬義陽郡。後廢焉。置廣昌縣及廣昌郡。後魏置南荊州。西魏改曰昌州。隋開皇初郡廢。仁壽元年避太子名。改廣昌縣曰棗陽。大業初州廢。置春陵郡。唐武德初郡廢。五年改昌州爲唐州。九年州徙治北陽。正觀十年以棗陽來屬。漢春陵縣。本蔡陽之白水鄉。元朔五年以零陵冷道之春陵鄉封長沙王子買爲春陵侯。至戴侯仁以春陵地形下濕。上書請徙南陽。元帝許之。以蔡陽白水鄉徙仁爲春陵侯。光武其後也。故張衡賦云。龍飛白水。晉改爲安昌縣。後復曰春陵。置安昌郡。隋開皇初郡廢。屬昌州。大業初屬春陵郡。後省之。故城在今縣東。後漢襄鄉縣。屬南陽郡。後廢焉。故城在今縣東北。

上金州。春秋戰國皆屬楚。秦及二漢屬漢中郡。魏以漢中遣人在東陲者置魏興郡。晉宋齊皆因之。梁兼置南梁州。西魏改曰東梁州。以其地出金。又改爲金州。置金城郡。隋開皇初郡廢。大業三年州廢。置西城郡。唐武德元年曰金州。天寶元年曰安康郡。至德二載改曰漢陰郡。後復曰安康。石景升懷德軍。尋罷。皇朝乾德五年升昭化軍。今縣五。

下西城縣。本媯墟。舜常居之。二漢屬漢中郡。建安中置西城郡。劉備以申儀爲太守。儀據郡降魏。魏文帝改爲魏興郡。晉因之。後周省入吉安。隋大業三年改縣曰金川。復置西城郡。義寧二年縣復曰西城。唐爲金州。有伏羲山。

下平利縣。漢長利縣。屬漢中郡。東漢省之。晉復置。屬魏興郡。宋改爲錫縣。後廢。梁初置上廉縣。後改曰吉陽。西魏改曰吉安。後廢。唐武德元年置平利縣。大曆六年省。長慶初復置。皇朝熙寧六年省。元祐二年復置。有女媯山。

中洵陽縣。北山洵水所出。南入沔。故以名縣。漢屬漢中郡。後漢省之。晉復置。屬魏興郡。後置洵陽郡。隋開皇初郡廢。屬西城郡。唐屬金州。洵陽鎮。本西魏洵陽郡。後周郡廢。置黃土縣。隋屬西城郡。唐屬金州。天寶元年更名洵陽。皇朝乾德四年省入洵陽。

中下漢陰縣。本漢安陽縣。屬漢中郡。東漢因之。晉改爲安康。屬魏興郡。後改曰寧都。南齊置安康。屬西城郡。唐屬金州。至德二載以安祿山姓改爲漢陰縣。

下石泉縣。南齊曰永樂縣。置晉昌郡。西魏改郡曰魏昌。改縣曰石泉。後周郡廢。隋屬西城郡。唐屬全州。下房州。春秋時爲麇庸二國。戰國屬楚。秦二漢屬漢中郡。魏置新城郡。晉宋齊梁因之。西魏置光遷國。後周國廢爲郡。隋開皇初郡廢。大業初改州爲房州。州廢。置房陵郡。唐武德元年曰遷州。正觀十年州廢。自竹山徙房州。治此。天寶元年曰房陵郡。皇朝雍正三年升保康軍節度。今縣二。上房陵縣。秦徙趙王。遷於房陵。卽此。二漢屬漢中郡。魏置新城郡。以孟達爲太守。達叛附蜀。司馬宣王討平之。西魏置光遷國。後周郡縣並改爲光遷。隋置房陵郡。唐正觀十年改縣曰房陵。爲房州治焉。武后廢中宗爲廬陵王。遷之於此。故永清縣。本房陵縣地。後魏分置大洪縣。後周改焉。隋屬房陵郡。唐屬房州。皇朝開寶中省。

下竹山縣。故庸國。嘗從周武王伐紂。牧誓所謂庸蜀羌鬻。二漢爲上庸縣。屬漢中郡。魏分置上庸郡。晉宋因之。後廢。梁置安城縣。西魏改爲竹山。置羅州。隋開皇初改爲房州。大業初州廢。屬房陵郡。唐武德元年置房州。正觀十年徙治房陵。故上庸縣。亦漢上庸縣地。梁置新豐縣。西魏改爲上庸。後周改曰孔陽。隋開皇十八年復曰上庸。屬房陵郡。唐屬房州。皇朝開寶中省。有白馬塞山。孟達嘗登之。嘆曰。此金城千里。

上均州。春秋時屬麇。戰國屬韓。二漢屬南陽。漢中二郡。魏屬南鄉郡。晉屬順陽郡。宋置始平郡。後置武當郡。齊於此僑立始平郡。尋改爲齊興郡。梁兼置興州。後周改曰豐州。隋開皇初郡廢。改州爲均州。大業初。

州廢。屬浙陽郡。唐武德元年置均州。天寶元年曰武當郡。今縣二。

上武當縣。二漢屬南陽郡。魏屬南鄉郡。晉屬順陽郡。後置武當郡。隋開皇初郡廢。置均州。大業初州廢。屬浙陽郡。唐復置均州。有古塞城在縣北。戰國時楚築以備秦。所據之山高峻嶮峭。今名大塞山。有武當山。

上鄖鄉縣。本漢錫縣地。屬漢中郡。魏屬魏興郡。晉太康三年置鄖鄉縣。宋因之。隋屬浙陽郡。唐屬均州。有錫穴。左傳文十一年楚潘崇伐麋。至于錫穴。是也。豐州縣。本漢長利縣地。屬漢中郡。梁置南上洛郡。西魏改郡曰豐利。而分錫置豐利縣。後周郡廢。隋以縣屬西城郡。唐屬均州。皇朝乾德六年省入鄖鄉。上郢州。春秋戰國皆屬楚。秦屬南郡。二漢屬江夏郡。晉宋爲竟陵郡。梁屬南司北新二州。西魏屬安州。後周置石城郡。兼置郢州。隋開皇初郡廢。大業初州廢。置竟陵郡。唐武德四年曰郢州。正觀元年州廢。隸都州。十七年復置。天寶元年曰富水郡。今縣二。

上長壽縣。本漢竟陵縣地。晉羊祜鎮荊州立石城。因山爲固。惠帝元康九年分江夏西部置竟陵。治此。宋太始六年置長壽縣。後周置石城郡。隋大業初置竟陵郡。唐爲郢州。

下京山縣。晉置新陽縣。梁置新州。梁寧郡。西魏改縣爲角陵。隋開皇初郡廢。大業初州廢。改角陵曰京山。屬安陸郡。唐武德四年置温州。正觀十七年州廢。屬郢州。富水鎮。本後漢南新市縣地。屬江夏郡。晉因之。西魏改爲富水。置富人郡。隋開皇初郡廢。屬安陸郡。唐屬温州。正觀十七年來屬。

上唐州。春秋時屬楚。戰國屬韓。秦屬南陽郡。二漢及晉皆因之。後魏置東荊州。西魏改爲淮州。爲重鎮。置兵以備東魏。隋開皇五年改爲顯州。州廢。置淮安郡。唐武德四年曰顯州。正觀十年改爲唐州。天寶元年曰淮安郡。今縣五。

中下泌陽縣。漢湖陽、舞陰、平氏縣地。屬南陽郡。後魏置石馬縣。後語訛爲上馬。隋屬舂陵郡。唐屬唐州。正觀元年省入湖陽。開元十五年復置。天寶元年改爲泌陽。天祐二年州自比陽徙治於此。改爲泌州。後復故平氏鎮。本漢平義縣。晉爲西平氏。屬義陽郡。後置漢廣郡。隋開皇初郡廢。以平氏屬淮安郡。唐屬唐州。皇朝開寶五年省入泌陽。有泌水在縣南。卽後漢光武初起兵破王莽將甄阜、梁丘賜死處。

中下湖陽縣。故蓼國。二漢屬南陽郡。晉省入棘陽。後魏復焉。置西淮安郡及南襄州。後郡廢。改州爲南平州。西魏改曰昇州。後又改曰湖州。後周改置昇州郡。隋開皇初郡廢。仁壽初改曰昇州。大業初州廢。以湖陽屬舂陵郡。唐屬唐州。棘陽。故謝國。詩所謂申伯番番。旣入于謝者也。二漢爲棘陽縣。屬南陽郡。晉屬義陽郡。其後省焉。故城在今縣西北。

中下比陽縣。漢屬南陽郡。後漢及晉皆因之。後魏曰陽平。置東荊州。西魏改爲淮州。隋開皇五年又改爲顯州。七年改陽平縣爲饒良。大業初又改曰比陽。置淮安郡。唐屬唐州。方城。山自比陽相比連百里。號曰方城。亦曰長城。馬仁陂。在縣北。溉田萬頃。

下桐柏縣。漢平氏縣地。屬南陽郡。梁置淮安縣及華州。上川郡。西魏改州爲淮州。後改曰純州。尋廢。隋開

皇初郡廢。更名縣曰桐柏。屬顯州。後屬淮陽郡。唐屬唐州。禹貢桐柏山。淮水所出。縣因山爲名。

下方城縣。本漢堵陽葉縣地。屬南陽郡。後漢及晉皆因之。其後廢焉。西魏置方城縣及襄邑郡。隋開皇初。郡廢。屬洧陽郡。唐屬唐州。有方城山。左傳所謂楚國方城以爲城者也。水經注云。方城邑西有黃城山。是長沮桀溺耦耕之所有水出黃城山。東流注淩水。則子路問津處。

同下州光化軍。春秋戰國皆屬楚。二漢屬南陽郡。晉宋屬順陽郡。西魏置鄴城郡。後周郡廢。隋屬襄陽郡。唐屬襄州。皇朝置光化軍。今縣一。

乾德縣。本楚地。陰國所遷。卽春秋左傳云遷陰于下陰者也。二漢爲陰縣。屬南陽郡。西魏置鄴城郡。後周郡廢。屬襄州。隋曰陰城。屬襄陽郡。唐正觀八年。省入穀城縣。屬襄州。皇朝乾德三年。以陰城鎮置光化軍。及置乾德縣。熙寧五年。廢軍。改乾德爲光化縣。屬襄州。後復置漢鄴縣。蕭何所封。屬南陽郡。後漢因之。晉置順陽郡。初治鄴焉。西魏置鄴城郡。後周廢入陰城。故城在今縣東北。

輿地廣記卷第九

京西北路

南輔潁昌府。春秋許國。戰國屬韓。秦置潁川郡。漢高帝爲韓國。尋復故。後漢因之。獻帝暫都之。魏晉並爲潁川郡。後魏亦同。西魏初得之。後入東魏。改曰鄭州。後周曰許州。隋開皇初。郡廢。大業初。州廢。復置潁川郡。唐武德四年。曰許州。天寶元年。曰潁川郡。後升忠武軍節度。梁改爲匡國軍。唐滅梁。復曰忠武。皇朝元豐三年。升潁昌府。崇寧四年。建爲南輔。今縣七。

次赤長社縣。本鄭長葛邑。其社中木暴長。因名長社。二漢及晉屬潁川郡。後魏爲郡治焉。酈道元爲郡守。於南城西側。修立客館。土下得一木根。甚壯大。疑是故社。恠長暴茂者也。隋開皇初。改爲潁川縣。唐武德四年。復爲長社。屬許州。許田鎮。本許國。二漢爲縣。屬潁川郡。獻帝都之。魏文帝改曰許昌。故城在今鎮南三十里。晉爲郡治焉。隋屬潁川郡。唐屬許州。後唐避諱。改曰許田。皇朝熙寧四年。省入長社。

次畿鄆城縣。戰國時爲魏邑。史記。楚昭陽伐魏。取鄆。是也。二漢及晉屬潁川郡。其後廢焉。隋開皇初。置鄆城縣。屬潁川。唐始屬蔡州。長慶元年。屬許州。有漢召陵縣故城在東。春秋齊桓公伐楚。次于召陵。是也。後漢征羗縣。故城在東南。

次畿陽翟縣。本夏禹之別都。後爲鄭櫟邑。戰國。韓景侯自新鄭徙都此。秦置潁川郡。二漢因之。晉屬河南

郡東魏置陽翟郡。隋開皇初郡廢。屬襄城郡。唐始屬河南府。會昌三年屬許州。有鈞臺在南。左傳所謂夏后有鈞臺之饗。卽此。

次畿長葛縣。本漢許縣地。隋開皇六年分許昌置。取長葛舊名。屬潁川郡。唐屬許州。

次畿臨潁縣。漢舊縣。屬潁川郡。東漢至隋皆因之。唐屬許州。繁城鎮。本漢潁陰縣之繁陽亭。魏文帝受禪於此。置繁昌縣。帝既受禪。自壇而降。曰舜禹之事。吾知之矣。壇前有二碑。後其碑六字生金。論者以爲司馬金行。故曹氏六世遷魏。西事晉。晉屬襄城郡。隋屬潁川郡。唐正觀元年省入臨潁。後唐避諱改爲繁城。

次畿舞陽縣。漢樊噲所封。二漢屬潁川郡。晉屬襄城郡。後改爲北舞。置定陵郡。隋開皇初郡廢。屬潁川。唐正觀元年屬許州。尋廢。開元四年復置。更名舞陽。有漢定陵縣故城。

中郊縣。春秋時爲楚邊邑。令尹子瑕城郊。是也。漢屬潁川郡。後漢省之。魏復置。青龍元年有龍見于郊之摩陂。明帝幸陂觀龍。於是改摩陂曰龍陂。城曰龍城。晉屬襄城郡。其後廢之。置龍山縣。隋開皇初改曰汝南。十八年改曰輔城。大業初改曰郊城。屬襄城郡。唐屬汝州。皇朝崇寧四年來屬。

西輔鄭州。高辛氏火正祝融之墟。周武王封管叔鮮。及爲銜命之國。鄭武公與平王東遷。武公滅二國而徙都焉。後鄭爲韓所滅。韓又徙都之。秦屬三川郡。二漢及魏屬河南郡。晉置滎陽郡。後魏爲東恒農郡。東魏置廣武郡。後周置鄭州。隋開皇十六年曰管州。煬帝初復爲鄭州。尋廢。置滎陽郡。唐正觀元年州廢。自

武牢移鄭州治此。天寶元年曰滎陽郡。皇朝景祐元年號奉寧軍節度。崇寧四年建爲西輔。今縣六望管城縣。故管國。周武王弟叔鮮所封。春秋晉師救鄭。楚子次于管以待之。卽此。漢晉爲京縣地。隋開皇十六年析內牟以置管城。屬滎陽郡。十八年改內牟曰圃田。省入管城。唐正觀七年自武牢移鄭州治此。東有圃田。爲豫州藪。有郟城。爲縣南。左傳晉楚戰處。

緊滎陽縣。故虢國。所謂東虢也。二漢屬河南郡。晉泰始二年置滎陽郡。後魏因之。北齊改曰成臯郡。隋開皇初郡廢。屬鄭州。唐因之。有鴻溝在西。楚漢中分天下處。漢京縣故城在東。古鄭邑也。莊公弟叔段居之。謂之京城太叔。二漢屬河南郡。晉及後魏屬滎陽郡。北齊省入焉。又有索水。楚漢戰京索間。卽此。上新鄭縣。古有熊國。黃帝所都也。亦爲高辛氏火正祝融之墟。其後世爲鄩國。亦作檜。詩之國風所謂檜。羔裘者也。鄭桓公始封。在今華州之鄭。其子武公與平王東遷。乃取鄩而徙居焉。是爲新鄭。戰國時鄭滅於韓。韓哀侯自平陽徙都之。二漢屬河南郡。晉以後不置。隋開皇十六年復之。屬滎陽郡。大業初省苑陵縣入焉。唐屬鄭州。有溱洧二水。

中原武縣。二漢屬河南郡。晉以後不置。隋開皇十六年復之。屬滎陽郡。唐屬鄭州。漢卷縣故城在東。中滎澤縣。禹貢所謂濟水溢爲滎者也。杜佑云。今濟水不復入滎。漢晉後魏爲滎陽縣地。隋開皇四年置廣武縣。仁壽元年更名滎澤。屬滎陽郡。唐屬鄭州。有廣武山。上有東西二城。中有絕澗。漢高帝項羽相與臨廣武之間而語。卽此。有敖山。商王仲丁自亳遷此。周宣王常狩其地。故詩言搏獸于敖。秦於此置

倉所謂敖倉也。故王宮城在今縣西北。左傳作王宮於踐土。卽此。今故城內東北隅有踐土臺是也。畿密縣本鄭邑。春秋諸侯伐鄭圍新密。二漢屬河南郡。晉屬滎陽郡。唐屬河南府。皇朝因之。崇寧四年來屬。

輔滑州古豕韋氏之國。春秋時屬衛。戰國時亦屬衛。其西境屬魏。秦屬東郡。二漢因之。晉爲陳留。濮陽二國。宋武帝平河南置兗州以爲邊鎮。後魏置東郡。隋置杞州。後爲滑州。又改爲兗州。後復爲東郡。唐復爲滑州。天寶元年更名靈昌郡。大曆七年升義成軍節度。後避梁王父諱改曰宣義軍。後唐復故而改靈昌曰靈河。皇朝太平興國四年改武成軍。今縣三。

中白馬縣本衛國曹邑。左傳閔二年狄滅衛立戴公以廬于曹卽此。二漢爲白馬縣屬東郡。袁紹遣顏良攻東郡太守劉延於白馬。關羽爲曹公斬良以報焉。晉屬濮陽國。宋置兗州。後魏置東郡。隋開皇初郡廢置杞州。十六年改爲滑州。大業二年改爲兗州。後復爲東郡。唐又爲滑州。有黎陽津。一曰白馬津。鄴生云守白馬之津是也。有靈河津。晉時石勒襲劉耀途出於此。以河冰泮爲神靈之助。故號爲靈昌津。後唐改爲靈河津。靈河鎮。漢南燕縣地。隋開皇十六年置靈昌縣。以津爲名。屬東郡。唐屬滑州。後唐改爲靈河縣。皇朝治平三年省入白馬。有滑臺。本鄭之廩延邑。其城甚固。

望章城縣。故豕韋氏國。商時爲伯焉。韋賢詩曰。肅肅我祖。國自豕韋是也。二漢爲白馬縣地。屬東郡。晉屬濮陽國。隋開皇六年置章城縣。屬東郡。唐屬滑州。

緊胙城縣。故南燕國。二漢爲南燕縣。屬東郡。晉省之。其後復置。曰東燕。隋開皇十八年。改曰胙城。屬東郡。唐屬滑州。胙城。周公諸子所封。左傳。富辰曰。凡蔣。邢。茅。胙。祭。周公之嗣也。杜預注。東郡燕縣西南有胙亭。而晉史地理志無此郡縣。豈永嘉喪亂。簡編失亡故耶。

望孟州。春秋戰國。皆屬周。自漢晉至隋。皆屬河內郡。唐顯慶二年。割屬河南府。建中二年。乃以河南之河陽。河清。濟源。溫。四縣租稅入河陽三城使。又以汜水軍賦益之。會昌三年。遂以此五縣爲孟州。今縣六。望河陽縣。古孟津也。周武王伐紂。師度孟津。卽此。亦曰富平津。魏尙書杜君畿試船沉溺之所。浮橋卽晉杜預所立。自漢至隋。屬河內郡。唐屬河南府。置河陽三城使。後置孟州。今縣西南十三里有遮馬堤。舊爲河陰縣。地後魏爾朱榮害朝士千三百餘人於此。

望溫縣。本周畿內國。司寇蘇忿生所封也。春秋僖十年。狄滅溫。蘇子奔衛。於是襄王以賜晉文公。二漢屬河內郡。晉因之。其後廢焉。隋開皇十六年。復置屬河內郡。唐武德四年。屬懷州。顯慶二年。屬洛州。後屬孟州。

望濟源縣。周大夫蘇生之原邑。周襄王以賜晉文公。文公伐原以示信。二漢爲軹縣地。晉爲沁水縣地。俗以濟水重源所發。因謂之濟源城。隋開皇十六年。置濟源縣。屬河內郡。唐武德四年。屬懷州。顯慶二年。屬洛州。後屬孟州。漢軹縣。屬河內郡。後漢及晉皆因之。隋大業初。省入河內。後復置。唐正觀元年。省入濟源。故城在縣東南。有溴水。春秋襄十六年。公會諸侯于溴梁。卽此。

上汜水縣。本東虢國。鄭滅之。爲制邑。所謂制巖邑。卽此。有故虎牢城。周穆王獵於鄭圃。獲虎。命畜之。因名曰虎牢。二漢爲成臯縣。屬河南郡。晉因之。宋時毛德祖戍虎牢。後魏晝夜攻圍。二百日。乃克。後魏置東中府。東魏置北豫州。後周置滎州。隋開皇初。曰鄭州。十八年。改成臯縣。曰汜水。大業初。置虎牢都尉府。屬滎陽郡。唐屬鄭州。顯慶二年。屬洛州。垂拱四年。曰廣武。神龍元年。復故。後屬孟州。有汜水關。皇朝大中祥符中。改爲行慶關。東南有成臯故關。西南有旋門故關。

中河陰縣。漢成臯。滎陽懷縣地。唐開元二十九年。割汜水。滎澤。武陟。三縣置。以便運漕。屬河南府。領河陰倉。汴渠在縣南二百五十步。卽古葭蕩渠。今名通濟渠。首受黃河。後屬孟州。有三皇山。亦曰嶽鄗山。山上有三城。卽劉項相持處。

中王屋縣。古召公之邑。漢垣縣。漢澤地。屬河東郡。晉屬河東。平陽郡。後魏置長平縣。後周改曰王屋。又置懷州。及平齊州。廢置王屋郡。隋開皇初。郡廢。屬河內郡。唐武德元年。更名邵伯。屬邵州。正觀元年。屬懷州。顯慶二年。復故名。屬洛州。皇朝慶曆三年。來屬。有禹貢王屋山。沈水所出。

緊蔡州。春秋時。屬沈蔡。戰國屬楚魏。秦屬潁川郡。漢置汝南郡。後漢及魏。晉皆因之。宋及後魏。兼置豫州。以爲重鎮。東魏置行臺。後周置總管府。後改曰舒州。尋復曰豫州。後改曰蔡州。隋開皇初。郡廢。大業初。州廢。復置汝南郡。唐武德三年。曰豫州。天寶元年。曰汝南郡。寶應元年。改曰蔡州。皇朝景祐二年。升淮康軍節度。今縣十。

上汝陽縣。漢平輿、宜春、安城縣地。屬汝南郡。後漢及晉皆因之。後魏曰上蔡。置汝南郡。城之西北。汝水枝別左出而北流。又屈而東轉。又西南會汝。若垂瓠。故謂之懸瓠城。宋元嘉二十七年。後魏太武攻懸瓠。汝南太守陳憲拒守。四十餘日不拔。隋開皇初。郡廢。大業初。復置縣。曰汝陽。唐爲蔡州。漢有汝陽縣。在西華南頓之間。非今縣也。漢宜春縣。屬汝南郡。後漢曰北宜春。晉因之。後廢焉。故城在今縣西南。漢平輿縣。故沈國。漢高帝四年。置汝南郡。後漢因之。晉屬汝南郡。後徙焉。故城在今縣東。漢安城縣。屬汝南郡。後漢及晉皆因之。後廢焉。故城在今縣東南。

上上蔡縣。故蔡國。蔡叔始封地。秦爲上蔡縣。李斯。其邑人也。漢屬汝南郡。後漢及晉皆因之。後魏改爲臨汝。北齊廢之。隋開皇中。置曰武津。大業初。復改爲上蔡。屬汝南郡。唐屬蔡州。

中新蔡縣。古呂國。春秋時。蔡平侯自上蔡遷此。故曰新蔡。二漢屬汝南郡。魏晉屬汝陰郡。南齊置北新蔡郡。後魏曰新蔡郡。北齊曰廣寧郡。隋開皇初。郡廢。十六年。置廣寧縣。仁壽元年。改曰汝北。大業初。改曰新蔡。屬汝南郡。唐屬蔡州。漢桐陽縣。屬汝南郡。後漢因之。晉屬汝陰郡。北齊廢之。隋開皇十一年。復置屬淮陽郡。後廢焉。故城在今縣北。有葛陂。

中褒信縣。後漢舊縣。屬汝南郡。魏晉屬汝陰郡。宋改曰包信。隋大業初。復故名。屬汝南郡。唐屬蔡州。西南有白亭。楚王孫勝爲白公。卽此。

中平輿縣。漢舊縣。後廢。隋大業初。改新蔡爲平輿。屬汝南郡。唐屬蔡州。有葛陂。水經云。億水左迤爲葛陂。

方數十里。水物含靈多所包育。後漢費長房投竹化成龍處。

中遂平縣。故房子國。國語所謂周昭王娶于房。曰房后是也。楚靈王遷房於楚。而有其地。後以封吳王之弟夫槩。爲堂谿氏。故曰吳房。漢屬汝南郡。後漢及晉皆因之。後曰遂寧。隋大業初改曰吳房。屬汝南郡。唐屬蔡州。元和十二年平吳元濟。更名遂平。

中新息縣。故息國。二漢屬汝南郡。晉爲郡治焉。後魏置東豫州。梁曰西豫州。又改曰淮州。東魏復曰東豫州。後周曰息州。隋大業初州廢。屬汝南郡。唐屬蔡州。漢安陽縣。故江國也。二漢及晉皆屬汝南郡。後廢焉。故城在今縣西。

中確山縣。本漢安昌縣。屬汝南郡。後漢省之。其後復置。隋開皇十八年改爲朗山。屬汝南郡。唐屬蔡州。皇朝大中祥符五年改爲確山。漢朗陵縣。屬汝南郡。後漢及晉皆因之。後廢焉。故城在今縣西南。有道城。故道國。左傳曰江黃道柏皆弦姻也。在漢爲陽安縣。後漢及晉皆因之。後廢焉。

中眞陽縣。本漢慎陽縣。屬汝南郡。慎字本作眞。音眞。永平五年失印更刻。遂誤以水爲心也。後漢及晉皆因之。後魏置郢州。東魏廢州置義陽郡。北齊廢郡入保城縣。隋開皇十一年廢保城。十六年置眞丘縣。大業初改曰眞陽。屬汝南郡。唐屬蔡州。漢新陽縣。屬汝南郡。後漢因之。晉省焉。故城在今縣西南。

中西平縣。故柏子國。漢舊縣。屬汝南郡。後漢及晉皆因之。後魏置襄城郡。北齊改曰文城郡。隋開皇初郡廢。屬汝南郡。唐屬蔡州。

上陳州包犧氏都曰太昊之城周封舜後媯滿於此以備三恪爲陳國楚滅爲縣楚頃襄王自郢徙郡此兼爲魏境秦屬潁川郡二漢屬淮陽國汝南郡後漢因之晉屬梁國汝南郡後魏置陳郡及北揚州北齊改爲信州隋爲陳州後置淮陽郡唐爲陳州晉開運二年置鎮安軍節度漢初軍廢周廣順二年復之今縣五

緊宛丘縣周時陳都楚頃襄王滅之自郢徙都焉陳勝反秦據陳自立爲張楚漢高帝置淮陽國章和二年改爲陳國晉併入梁國後魏曰項置陳郡隋開皇初改縣曰宛丘而郡廢焉大業初爲淮陽郡唐爲陳州爾雅曰丘上有丘曰宛丘今其地形則然有古固陵城項羽南走固陵卽此

上項城縣本項國戰國屬楚項羽家世楚將封於項故姓項氏二漢屬汝南郡晉屬梁國後魏置揚州及秣陵縣梁改曰殷州東魏改曰北揚州後齊改曰信州後周改曰陳州隋開皇初改秣陵爲項城縣大業初州廢屬淮陽郡唐屬陳州

中商水縣本漢汝陽縣地屬汝南郡後漢及晉皆因之後魏置汝陽郡北齊郡廢隋開皇十六年置潑水縣大業初省汝陽入焉屬淮陽郡唐屬陳州皇朝建隆元年改爲商水漢地理志汝南有潑縣水經注云潑水出潁川陽城縣少室山東逕潑縣故城南又東逕西華縣故城南又東逕汝陽故城北東注于潁

中南頓縣故頓子國應劭曰頓迫於陳其後南徙故曰南頓二漢及晉屬汝南郡後魏置南頓郡北齊郡

廢。隋開皇六年改縣曰和城。太業初復改曰南頓。屬淮陽郡。唐屬陳州。皇朝熙寧六年省入商水。元祐元年復置。

中西華縣。二漢屬汝南郡。晉省之。後置長平縣。隋開皇十八年改曰鴻溝。大業初復改曰西華。屬淮陽郡。唐武德元年更名箕城。屬陳州。景雲九年復故名。長平鎮。漢爲長平縣。屬汝南郡。後漢屬陳國。晉屬梁國。北齊省入西華。

上潁州。春秋時爲胡國及楚地。秦爲潁川郡地。二漢屬汝南郡。魏置汝陰郡。晉因之。後魏置潁川郡。隋亦爲潁川。復爲汝陰郡。唐爲潁州。皇朝元豐二年升順昌軍節度。今縣四。

望汝陰縣。西北有胡城。故胡國。二漢爲汝陰縣。屬汝南郡。魏置汝陰郡。後廢。晉泰始二年復置。隋開皇初郡廢。大業初復置。唐爲潁州。二漢細陽縣。屬汝南郡。晉省之。故城在今縣西北。

緊萬壽縣。蓋二漢細陽縣地。皇朝開寶六年析汝陰之百尺鎮置萬壽縣。屬潁州。水經注云。百尺水承次塘細陂。南流。注于潁。鎮實因水爲名。

緊潁上縣。本楚慎縣地。二漢屬汝南郡。晉屬汝陰郡。後廢焉。梁置下蔡郡。北齊郡廢。隋大業初置潁上縣。於故鄭城。屬汝陰郡。唐武德四年移於今治。屬潁州。慎縣故城在今縣西北。

緊沈丘縣。本漢項縣地。屬汝南郡。後置沈丘縣。隋開皇十六年置沈州。領沈丘、宛丘、二縣。唐初州廢。以宛丘屬陳州。沈丘屬潁州。後省沈丘入汝陰。神龍二年復置。有武丘。本曰丘頭。魏王陵鎮壽春。欲興兵討

司馬宣王宣王自往征之。軍至丘頭。陵懼。面縛水次。故號爲武丘。卽此。

輔汝州。東周爲王畿。春秋爲戎蠻子邑。及屬楚鄭。戰國屬韓。秦屬三川郡。二漢屬河南。潁川郡。魏晉屬河南。襄城郡。後魏屬汝北。魯陽郡。東魏置北荊州。後周改曰和州。隋初置伊州。煬帝初改爲汝州。後廢州。以其地屬襄城。潁川二郡。唐爲汝州。天寶元年曰臨汝郡。今縣五。

中梁縣。本漢周承休邑。武帝元鼎四年。行幸至洛陽。詔封姬嘉爲周子南君。以奉周祀。初元五年。以周子南君爲周承休侯邑。屬潁川郡。後魏曰汝源縣。置汝北郡。後改曰汝陰郡。後周郡廢。隋大業初。改汝源爲承休。置襄城郡。唐爲汝州。正觀元年。改承休爲梁縣。梁本周南鄙之邑。在承休西南四十五里。有霍陽聚。左傳哀四年。楚人爲一昔之期。襲梁及霍。是也。戰國曰南梁。以別大梁少梁焉。漢屬河南郡。後漢及晉皆因之。隋屬襄城郡。唐曰承休。正觀元年。省梁入承休。而更名承休曰梁。西有廣成澤。後漢作菟。爲遊獵之地。鄧太后臨朝。世士以爲文德可興。宜廢蒐狩之禮。於是馬融作頌以諷焉。後桓帝復校獵廣成。今曰廣潤河。蓋避朱梁廟諱也。有罍狐聚。秦滅西周。徙其君於此。有陽人聚。秦滅東周。徙其君於此。臨汝鎮。唐先天元年置縣。屬汝州。正元八年。以梁縣西界二鄉益之。兼移縣於石城驛。後入梁。緊襄城縣。本鄭地。南有汜城。周襄王避叔帶之難。出適鄭。處于汜。是也。以襄王所居。因曰襄城。楚靈王築。又有古不羹城。在西北。二漢屬潁川郡。晉置襄城郡。隋開皇初。郡廢。屬汝州。大業初。州廢。屬潁川郡。唐武德元年。置汝州。正觀元年。州廢。屬許州。開元二十六年。來屬。

上葉縣。本楚地。惠王以封沈諸梁。謂之萊公。萊公好龍。神龍下焉。二漢屬南陽郡。明帝時。王喬爲萊令。每月望。常乘雙鳧入朝。今有墓在焉。晉屬南陽國。北齊置襄州。後周廢州。置南襄城郡。隋開皇初。郡廢。屬許州。唐開元三年。置仙州。二十六年。州廢。大歷四年。復置仙州。又析置仙鳧縣。五年。州廢。省仙鳧入葉。來屬。二漢父城縣。屬潁川郡。晉屬襄城郡。後廢入葉。有應鄉。故應國。按汲冢古文。商時已有應國矣。周武王以封其子爲應侯。故左傳言邶。晉。應。韓。武之穆也。戰國爲秦所有。以封范雎。爲應侯。有方城。左傳所謂楚國方城以爲城。卽此。又有昆陽城。卽光武破王尋之所。

中魯山縣。在夏爲魯縣。陶唐氏旣衰。其後有劉累。爲御龍氏。以事夏孔甲。龍一雌死。潛醢以食夏后。旣而使求之。懼而遷于魯縣。是也。漢爲魯陽。屬南陽郡。後漢及晉皆因之。後魏置荊州。尋廢。立魯陽郡。後置魯州。隋開皇初。郡廢。大業初。州廢。以魯縣屬襄城郡。唐爲魯山。武德四年。復置魯州。正觀九年。州廢。以魯山來屬。故犇縣。本鄭邑。漢屬南陽郡。後廢。故城在今縣東南。後周置三鷄鎮。在縣西南十九里。亦名平高城。以備齊。北齊置魯城。在縣東北十七里。以禦周。

中龍興縣。本湍陽縣。唐武德四年。置屬伊州。正觀元年。省。證聖七年。復置。曰武興。置汝州。神龍元年。更名爲中興。尋改曰龍興。皇朝熙寧四年。省入魯城。元祐元年。復置。

同下州。信陽軍。春秋時屬申。其後屬楚。秦屬南陽郡。二漢屬南陽。江夏郡。晉置義陽郡。宋置宋安郡。南齊置司州。梁因之。有三關之隘。北接陳汝。控帶許洛。宋以來。常爲邊鎮。後魏改曰郢州。後周改曰申州。隋開

皇初郡廢。大業二年，改曰義州。尋爲義陽郡。唐爲申州。天寶元年，曰義陽郡。皇朝開寶九年，降爲義陽軍。太平興國元年，改爲信陽。今縣二。

中下信陽縣。二漢平氏縣地。屬南陽郡。晉分置義陽縣。屬義陽郡。後廢焉。宋曰平陽縣。置宋安郡。隋開皇初，郡廢。改平陽縣爲義陽。大業初，置義陽郡。唐爲申州。皇朝爲義陽軍。太平興國元年，改義陽縣爲信陽。漢鐘武縣。屬江夏郡。後漢省焉。故城在今縣東南。漢鄆縣。屬江夏郡。後漢及晉因之。北齊改爲齊安。置齊安郡。隋開皇初，郡廢。改縣曰鐘山。屬義陽郡。唐屬申州。皇朝開寶九年，省入義陽。有鐘山、桐柏山、淮水。

中下羅山縣。二漢鄆縣地。北齊置高安縣。隋開皇初，廢。十六年，復置。曰羅山。屬義陽郡。唐屬申州。皇朝屬信陽軍。有石城山。甚高峻。史記曰：魏攻冥阨，蓋謂此山也。呂氏春秋言九塞，冥阨其一焉。

輿地廣記卷第十

河北東路

北輔開德府。春秋時屬衛國。秦置東郡。二漢屬東魏。二郡。晉屬濮陽國。頓丘郡。隋屬東武陽。二郡。唐屬澶、濮、魏。三州。晉天福中移濮陽於澶州南郭爲治所。九年升鎮寧軍節度。皇朝大觀元年升開德府。崇寧四年建爲北輔。今縣七。

中濮陽縣。本漢頓丘縣地。其濮陽故城在今縣東。帝顓頊之墟也。謂之帝丘。夏后相嘗居於此。夏伯昆吾亦都之。春秋時衛成公自楚丘徙焉。夢康叔曰相奪予享。公命祀相。秦始皇東徙衛君角而置東郡。二漢皆因之。晉置濮陽國。隋屬東郡。唐屬濮州。晉天福中移縣於澶州南郭爲治所。有鮒鰮山。帝顓頊所葬。有瓠子口。漢元光中河決瓠子。東南注鉅野。

望觀城縣。古觀國。嘗叛命爲夏所伐。左傳所謂夏有觀扈是也。漢爲畔觀縣。屬東郡。光武更名衛國。以封周後。晉屬頓丘郡。隋開皇六年更名觀城。屬武陽郡。唐屬澶州。有臨黃縣。漢畔觀縣地也。後魏置。隋因之。屬武陽郡。唐始屬魏州。大歷七年來屬。皇朝雍正四年省入觀城。有新臺。衛宣公作。

緊臨河縣。漢黎陽縣地。屬魏郡。隋開皇六年析黎陽置臨河縣。十六年置澶淵縣。並屬汲郡。春秋諸侯之大夫會于澶淵。此其地也。後避唐高祖諱。改澶淵爲澶水。武德四年於澶水置澶州。正觀十年州廢。省。

澶水入臨河屬魏州五代來屬。

中清豐縣漢頓丘縣地唐大歷七年析頓丘昌樂置清豐縣以孝子張豐爲名屬澶州頓丘本衛邑在淇水南故詩言送子涉淇至于頓丘二漢屬東郡晉置頓丘郡後郡廢焉隋屬武陽郡唐始屬魏州大歷七年於頓丘復置澶州晉天福四年移濮陽於澶州南郭爲治所而以頓丘爲德清軍皇朝熙寧四年省頓丘入清豐。

中衛南縣本楚丘也衛文公自曹邑徙此始建城市而營宮室隋開皇十六年置楚丘縣屬東郡大業初以梁郡有楚丘乃改爲衛南唐屬滑州五代時來屬。

畿朝城縣本二漢東武陽縣屬東郡臧洪爲東郡太守據此以拒袁紹紹圍之城陷爲紹所殺魏晉屬陽平郡北齊廢之後周復置武陽縣隋屬武陽郡唐屬魏州正觀十七年省永昌元年復置武聖縣開元七年更名朝城晉屬大名府皇朝崇寧四年來屬。

畿南樂縣漢東郡之樂昌也宣帝封王武爲樂昌侯後漢省之晉置昌樂縣水經樂昌縣故城東而注引漢書表志以爲東郡之屬縣漢宣帝封王稚君爲侯國此則以樂昌爲昌樂矣隋屬武陽郡開皇六年置繁水縣大業初廢昌樂縣入繁水唐置昌樂廢繁水入焉後唐避諱改爲南樂晉屬大名府皇朝崇寧四年來屬。

次府河間府春秋時屬晉戰國時屬趙秦屬上谷郡漢屬涿郡後漢爲河間國晉因之後魏爲河間郡孝

文帝置瀛州。隋廢郡而州如故。大業初，州廢。置河間郡。唐爲瀛州。皇朝大觀二年，升河間府。瀛海軍節度。今縣二。

望河間縣。本漢州鄉。武垣縣地。屬涿郡。後漢省州鄉入武垣。屬河間國。晉因之。後分置河間縣。郡徙治此。隋開皇初，郡廢爲瀛州。大業初，復置郡。省武垣入焉。唐爲瀛州。束城鎮。本漢束州縣。屬勃海郡。後漢屬河間國。晉屬章武國。北齊廢之。隋開皇十六年，置曰束城。屬瀛州。大業初，屬河間郡。唐屬瀛州。皇朝熙寧六年，省入河間。

望樂壽縣。本漢樂成縣。爲河間國治焉。後漢及晉皆因之。隋開皇十八年，改爲廣城。屬瀛州。仁壽初，改爲樂壽。屬河間郡。唐屬瀛州。後屬深州。景城鎮。本漢景成。成平縣地。屬勃海郡。後漢省。景成入成平。屬河間國。晉因之。隋開皇十八年，改爲景城。屬瀛州。大業初，屬河間郡。唐屬瀛州。皇朝熙寧六年，省入樂壽。上滄州。春秋戰國時，爲齊趙二國之境。秦屬鉅鹿。上谷郡。漢置渤海郡。後漢、晉因之。宋文帝置樂陵郡。孝武分置渤海郡。後魏因之。太武初，改渤海爲滄水。孝文時，復舊。孝明帝分瀛、冀二州。置滄州及浮陽、樂陵二郡。隋置棣州。後改爲滄州。尋爲渤海郡。唐爲滄州。天寶元年，改爲景城郡。今縣五。

望清池縣。本漢浮陽縣。在浮水之陽。高帝置渤海郡。治此。後漢及晉皆屬焉。隋開皇十八年，改曰清池。屬渤海郡。唐屬滄州。正觀元年，州自胡蘇徙治於此。長蘆鎮。以水爲名。本漢參戶縣地。屬渤海郡。後省焉。隋開皇初，置長蘆縣及漳河郡。尋廢。十六年，置景州。大業初，州廢。屬河間郡。唐武德四年，又置景州。正

觀元年。州廢。屬滄州。周省入清池。饒安鎮。本漢千童縣。屬渤海郡。靈帝改曰饒安。晉因之。後置滄州及浮陽郡。隋開皇初。郡廢。大業初。州廢。屬渤海郡。唐屬滄州。皇朝熙寧五年。省入清池。乾符寨。本二漢章武縣。屬渤海郡。晉屬章武郡。後省焉。隋開皇十六年。置魯城縣。屬瀛州。大業初。屬河間郡。唐正觀元年。屬滄州。乾符元年。生野稻。水穀二千餘頃。燕魏飢民就食之。因改名曰乾符。周省入清池。有徒駭河。禹貢九河之一也。

望無棣縣。本齊地。昔周成王賜齊太公履。北至于無棣。是也。漢爲陽信縣地。隋開皇六年。置無棣縣。屬渤海郡。取縣南無棣溝爲名。唐屬滄州。正觀元年。省入陽信。八年。復置無棣溝。通海。隋末廢。唐永徽元年。薛大鼎開之。百姓歌曰。新河得通舟楫利。直達滄海魚鹽至。昔日徒行今騁駟。美哉薛公德。滂被皇朝。治平二年。徙治保順軍。有鬲津河。禹貢九河之一也。

緊鹽山縣。二漢高城縣。屬渤海郡。故城在今縣南。晉以後皆因之。隋開皇十八年。改爲鹽山。屬棣州。大業初。屬渤海郡。唐屬滄州。有鹽山。

緊樂陵縣。二漢屬平原郡。故城在今縣東。晉屬樂陵國。後爲樂陵郡。治焉。隋開皇初。郡廢。屬棣州。大業初。屬渤海郡。唐屬滄州。有漢重合縣。故城在縣東。皇朝熙寧二年。徙治咸平鎮。有鈎盤河。禹貢九河之一也。

中南皮縣。漢屬渤海郡。章武有北皮亭。故此云南皮。後漢爲渤海郡治焉。建安中。曹公破青州刺史袁譚。

於此晉因之。隋屬渤海郡。唐屬景州臨津鎮。本漢東光縣地。隋開皇十六年於胡蘇亭置胡蘇縣。屬平原郡。唐更名臨津。屬景州。皇朝熙寧六年省入南皮。有灤河。禹貢九河之一也。

上冀州。春秋時屬晉。戰國屬趙。秦屬鉅鹿郡。漢置信都國。景帝改爲廣川。宣帝復故。後漢明帝更名樂安。安帝改曰安平。後兼置冀州。晉因之。後魏爲長樂郡。兼置冀州。北齊後周皆因之。隋初郡廢。而冀州如故。大業初州廢。復置信都郡。唐爲冀州。皇朝慶歷八年升武安軍節度。今縣六。

望信都縣。漢爲信都國治。後漢爲安平國治。晉因之。後魏以來爲長樂郡治。隋開皇初郡廢。分信都置長樂縣。大業初省信都入焉。置信都郡。唐爲冀州。改長樂縣爲信都。有禹貢降水。漢昌城縣。屬信都國。後漢改爲阜城。後徙焉。故城在今縣北。漢扶柳縣。屬信都國。後漢屬安平國。晉因之。北齊省焉。故城在今縣西。

上舊縣。本漢脩縣。屬信都國。後漢屬渤海郡。晉因之。隋開皇五年改爲舊縣。屬冀州。大業初屬信都郡。唐屬德州。永泰元年屬冀州。漢觀津縣。故城在東北。

上南宮縣。漢舊縣。屬信都國。呂后封張敖子偃爲南宮侯。卽此。後漢屬安平國。晉省之。後復置。元魏屬長樂郡。北齊省之。隋開皇六年復置。屬冀州。大業初屬信都郡。唐屬冀州。堂陽鎮。本漢堂陽縣。屬鉅鹿郡。後漢屬安平國。晉省之。後復置。北齊省之。隋開皇十六年復置。屬冀州。大業初屬信都郡。唐屬冀州。皇朝皇祐四年省入南宮。

上棗疆縣。漢舊縣。屬清河郡。後漢省之。後復置。隋屬冀州。大業初。屬信都郡。唐屬冀州。漢廣川縣。屬信都國。後徙焉。故城在今縣東北。

上武邑縣。漢屬信都國。後漢屬安平國。晉因之。後齊廢。隋開皇六年。復置。屬冀州。大業初。屬信都郡。唐屬冀州。觀津鎮。本趙地。樂毅自燕降趙。封之於此。號爲望諸君。漢爲觀津縣。屬信都國。後漢及晉因之。後省。有衡漳石隄。唐顯慶元年築。

中衡水縣。隋開皇十六年。分信都北界。武邑西界。下博南界。置衡水縣。屬冀州。大業初。屬信都郡。唐屬冀州。

上博州。春秋爲齊之西境。戰國屬齊。趙衛三國之交。秦屬東郡。漢屬東郡。平原。清河。三郡。後漢屬東郡。平原。二郡。晉屬平原國。宋分置魏郡。後魏置南冀州及平原郡。隋初。郡廢。改州。爲博州。大業初。州廢。屬武陽郡。唐爲博州。天寶元年。曰博平郡。今縣四。

望聊城縣。本齊西鄙之邑。水經注云。聊城縣東北三十里有攝城。左傳所謂聊攝以東是也。戰國時。燕將保聊城。齊田單攻之。歲餘不下。魯仲連乃爲書約之矢。以射城中。燕將見書。乃自殺。二漢屬東郡。魏晉屬平原國。後爲平原郡。治焉。隋開皇初。郡廢。十六年。置博州。大業初。州廢。以聊城屬武陽郡。唐武德四年。置博州。漢在平縣。屬東郡。後漢屬濟北郡。魏晉屬平原國。昔石勒耕於在平。聞鼓角鞞鐸之聲。其母以爲作勞耳鳴。卽此。後廢焉。唐武德四年。析聊城置平在縣。正觀八年。省入。

望高唐縣春秋齊邑漢屬平原郡後漢及晉皆因之後魏置南清河郡北齊郡廢隋開皇初屬貝州大業初屬清河郡唐武德四年屬博州

望堂邑縣本漢清陽縣地爲清河郡治焉隋開皇六年分置堂邑縣屬武陽郡唐武德四年屬博州

緊博平縣漢屬東郡魏晉屬平原國元魏屬長樂郡隋開皇初屬貝州大業初屬清河郡唐屬博州漢靈

縣屬清河郡後漢及晉因之後廢隋開皇初復置大業初省入博平唐武德三年復置四年省入焉

上棣州春秋戰國皆屬齊秦屬齊郡漢屬渤海平原千乘郡後漢屬北海平原郡樂安國晉屬樂安樂陵

二國宋爲樂陵郡後魏又爲樂安樂陵二郡隋初屬棣州後屬渤海郡唐武德三年置棣州天寶元年曰

樂安郡今縣三

望厭次縣本漢陽信縣地屬渤海郡後漢因之晉屬樂陵國後爲渤海郡治元魏屬樂陵郡隋開皇六年

置棣州大業初爲渤海郡後郡徙治清地唐武德四年以陽信置棣州八年州廢屬滄州正觀十七年

復置於厭次皇朝大中詳符八年徙州城及厭次於陽信縣地

中滴河縣本漢枋縣屬平原郡後漢省之隋開皇十六年置滴河縣屬棣州大業初屬渤海郡唐屬棣州

漢濕沃縣屬千乘郡後漢省之晉復置屬樂陵國北齊省之後入滴河

下陽信縣本漢富平縣後改爲厭次屬平原郡後漢永平五年復故晉爲樂陵國治焉元魏屬樂陵郡北

齊廢之隋開皇十六年復置屬棣州大業初屬勃海郡唐武德四年屬棣州八年州廢屬滄州正觀十

七年復置屬棣州。皇朝大中祥符八年徙州城及厭次縣於陽信而徙陽信於故厭次焉。

上莫州漢爲鄭縣屬涿郡。後漢屬河間國。晉因之。隋屬四間郡。唐武德四年屬蒲州。正觀元年屬瀛州。景雲二年置鄭州。開元十三年以鄭鄭文相類更名莫州。今縣一。

上任丘縣。本漢鄭縣地。平帝時使中郎將任丘築城。因以爲名。後置任丘縣。隋省之。唐武德五年復屬蒲州。景雲二年屬鄭州。開元十三年改鄭縣爲莫。皇朝熙寧六年省莫縣入焉。長豐縣。本利豐。唐開元十一年析文安任丘置屬鄭州。是年更名長豐。皇朝熙寧六年省。

中雄州。春秋戰國皆屬燕。秦屬六合郡。唐屬涿。易二郡。晉時入于契丹。周克復之。置雄州。皇朝政和三年爲易陽郡。今縣二。

中歸信縣。本漢易縣地。屬涿郡。後漢屬河間國。公孫瓚有幽州。童謠曰。燕南垂。趙北際。中央不合大如礪。唯此中可避世。瓚自以爲易地當之。遂徙鎮焉。易京故城在縣南十八里。晉亦屬河間國。北齊省入鄭縣。隋屬河間郡。唐武德五年置歸義縣。屬幽州。正觀元年省之。八年復置。景雲二年屬漠州。是年還屬幽州。大歷四年屬涿州。晉時入于契丹。周顯德六年世宗克瓦橋關。置雄州。治歸義縣。皇朝太平興國元年改爲歸信。有易水。

中容城縣。漢屬涿郡。後漢省之。晉復置。屬范陽國。隋開皇初改爲遼縣。屬上谷郡。唐武德五年置北義州。正觀元年州廢。以縣屬易州。聖歷二年契丹入寇。固守不陷。因改名全忠。神龍二年復名遼。天寶元年。

改爲容城。周顯德六年屬雄州。尋廢。皇朝建隆四年復置。

中霸州。漢屬渤海郡。後漢屬廣陽國。河間郡。晉屬燕國。章武。後屬河間。燕郡。隋屬河間。涿郡。唐屬幽州。莫州。晉時入于契丹。周克復之。置霸州。皇朝政和三年爲永清郡。今縣二。

上文安縣。漢屬渤海郡。後漢屬河間國。晉屬章武國。隋初屬瀛州。大業初屬河間郡。唐屬瀛州。景雲二年屬莫州。周顯德六年屬霸州。皇朝景祐元年省永清入焉。永清本漢安次縣地。屬渤海郡。唐如意元年析置武隆縣。屬幽州。景雲元年曰會昌。天寶元年曰永清。晉時入于契丹。周世宗克益津關。置霸州。治永清縣。後省入文安。

上大城縣。五代時置屬瀛州。周顯德六年屬霸州。

上德州。春秋戰國皆屬齊。秦屬齊郡。漢置平原郡。後漢因之。晉爲平原國。宋屬平原郡。後魏後周皆因之。隋初置德州。後復爲平原郡。唐爲德州。天寶元年曰平原郡。今縣二。

望安德縣。漢屬平原郡。後漢及晉皆因之。後爲郡治焉。隋開皇初郡廢。九年置德州。大業初復置平原郡。唐爲德州。天寶末安祿山反。河北皆陷。獨顏真卿爲平原太守。帥衆討賊。漢鬲縣屬平原郡。後漢及晉因之。北齊省入。故城在縣西北。漢重平縣屬渤海郡。後漢省之。後魏復置。北齊省之。故城亦在縣西北。德平鎮。蓋漢平昌縣屬平原郡。後漢省之。晉爲西平昌。屬平原國。後魏置東安郡。北齊郡廢。隋開皇初屬德州。大業初屬平原郡。唐屬德州。後謂之德平。疑後唐避諱更名。皇朝熙寧六年省入安德。

緊平原縣。齊之西邑。韓信夜渡平原。襲擊齊。歷下軍。卽此。漢高帝六年。置平原郡。故城在今縣西南。後漢及晉皆因之。後郡徙治安德。隋屬平原郡。唐屬德州。漢鄒縣屬清河郡。後漢及晉因之。北齊省入平原。故城亦在縣西南。

上濱州。自唐虞以下。地理與涿州同。初五代之際。置權監務於海傍。後置贍國軍。周世宗顯德三年。置以其濱海爲名。割棣州之渤海。蒲臺爲屬縣。而治渤海。今領縣二。

望渤海縣。唐垂拱四年。析蒲臺。厭次置屬棣州。周顯德三年。置濱州。治此。蒲臺鎮。本漢鬲縣地。屬平原郡。臺高八丈。方二百步。昔秦始皇東遊海上。於臺下繫蒲繫馬。至今蒲生猶有繫繫之狀。隋開皇十六年。置蒲臺縣。屬渤海郡。唐屬淄州。景龍元年。屬棣州。周屬濱州。皇朝大中祥符三年。省入渤海。

緊招安縣。皇朝慶歷六年。析渤海縣地置。

下恩州。春秋時屬齊。其後屬晉。戰國屬趙。秦屬鉅鹿郡。漢置清河郡。後漢爲清河國。桓帝改曰甘陵。魏復故。晉因之。後魏爲清河郡。北齊後周皆因之。兼置貝州。隋初郡廢。後廢州。而後復置郡。唐爲貝州。天寶元年。曰清河郡。皇朝慶歷八年。改恩州。今縣三。

望清河縣。本漢厝縣。屬清河郡。後漢安帝以孝德皇后葬于厝。改曰甘陵。爲清河國治焉。桓帝時周福。其

縣人也。晉改曰清河縣。後曰武成縣。置清河郡。隋開皇初。郡廢。改武成縣爲清河。大業初。復置清河郡。

唐屬貝州。故清陽縣。漢爲清河郡治。後漢省之。徙治甘陵。後復置曰清河縣。北齊省貝丘入焉。改爲貝

丘。隋開皇六年。復名清陽。屬清河郡。唐屬貝州。皇朝熙寧四年。省入清河。

望武城縣。在趙時曰東武城。平原君勝封於此邑。漢屬清河郡。後漢及晉皆因之。隋爲武城。屬清河郡。唐

屬貝州。

緊歷亭縣。漢東陽縣地。隋分武城。鄒置歷亭縣。屬清河郡。唐屬貝州。漳南鎮。本漢東陽縣。屬清河郡。後漢省之。隋分棗強。清平。復置於古東陽城。改爲漳南縣。屬清河郡。唐屬貝州。皇朝至和元年。省入歷亭。

清州。自唐虞以下。地理與滄州同。五代時。置乾寧軍。後入契丹。周顯德六年。世宗北伐。取乾寧軍。御龍舟樓。舡戰艦。首尾數十里。至益津關。後廢焉。皇朝太平興國七年。以滄州永安縣復置。大觀二年。河清七晝夜。因改爲清州。政和二年。爲乾寧郡。今縣一。

乾寧縣。本永安縣之范橋鎮。皇朝太平興國七年。置。熙寧六年。省爲鎮。後復置縣。崇寧三年。又省之。同下州永靜軍。自唐虞以下。地理與滄德冀州同。唐置景州。周降爲定遠軍。屬滄州。皇朝太平興國六年。以軍直隸京師。景德元年。改爲永靜。今縣三。

緊東光縣。二漢屬渤海郡。隋開皇初。郡廢。九年。置觀州。大業初。州廢。屬平原郡。唐屬滄州。正元三年。屬景州。周顯德元年。爲定遠軍治所。弓高鎮。本漢縣。屬河間國。後漢因之。晉省焉。隋開皇十六年。復置。屬平原郡。唐置景州。治此。周顯德二年。州廢。省弓高入東光。

望將陵縣。漢重丘縣地。隋開皇十六年。於重丘故城置。屬平原郡。唐屬德州。後屬景州。周顯德二年。州廢。

還屬皇朝慶歷七年屬永靜軍安陵鎮本漢脩市縣地屬渤海郡晉置安陵縣隋大業初省入東光唐武德四年復置屬觀州正觀十七年州廢屬德州景福二年屬景州周復屬後省入將陵

中阜城縣漢屬渤海郡後漢屬安平國晉屬渤海郡隋屬信都郡唐屬冀州皇朝淳化元年屬永靜軍同下州信安軍自唐虞以下地理與霸州同五代時地入契丹周顯德六年世宗北伐取淤口關置寨屬霸州皇朝太平興國六年以淤口寨爲破虜軍景德二年改爲信安軍同下州保定軍自唐虞以下地理與雄州同皇朝太平興國六年以涿州歸信縣新鎮置平戎軍景德元年改爲保定軍

輿地廣記卷第十一

河北西路

次府真定府。春秋時屬鮮虞。爲晉所滅。戰國時屬趙。秦屬鉅鹿郡。漢高帝置恆山郡。後避文帝名。改曰常山。亦屬真定國。東漢屬常山國。魏晉復爲郡。元魏因之。後周兼立恆州。隋開皇初郡廢。大業初州廢。復立常山郡。唐武德初復曰恆州。後升爲成德軍節度。元和十五年避穆宗諱。曰鎮州。五代時曰真定府。梁以諱改曰武順。後唐復曰成德。晉曰順德。漢復曰成德。周及皇朝因之。今縣九。

次赤真定縣。本中山國之東垣邑。漢十一年代相陳豨反。其將趙利守東垣。高帝攻拔之。改曰真定。元鼎四年立真定國。東漢併入常山。魏晉爲郡治。在今縣南。元魏道武移郡治於此。今府城是也。自唐寶應後。叛將李寶臣王武俊王廷湊等相繼據之。有滹沱水。

次畿臺城縣。漢屬真定國。北齊立鉅鹿郡。後周因之。隋開皇初郡廢。十年立廉州。大業初廢。義寧元年復立鉅鹿郡。唐武德元年改曰廉州。正觀元年州廢。來屬九門縣。二漢屬常山郡。魏晉元魏因之。北齊省。隋開皇六年復置。皇朝開寶六年省入。

次畿變城縣。春秋晉大夫欒氏之邑。漢爲平棘縣地。東漢置變城縣。北齊省。隋開皇十六年復置。屬變州。大業初州廢。屬趙郡。唐本屬趙州。大歷三年來屬。

次畿元氏縣。本趙公子元之封邑。漢高帝立恆山郡。治此。故城在焉。東漢爲國。魏、晉、元魏屬趙國。北齊省。隋開皇六年復置。唐屬趙州。五代時來屬。

次畿井陘縣。漢屬恆山郡。東漢、魏、晉、元魏皆因之。後省。北齊廢石邑。以置井陘。隋開皇六年復石邑。分置井陘。有陘山。其道險隘。李左車所謂車不得方軌。騎不得成列。是也。有綿蔓水。韓信攻趙。背水爲陣。卽此。

次畿獲鹿縣。漢石邑縣地。隋開皇十六年分置鹿泉縣。唐天寶十五載更名獲鹿。石邑鎮。本漢縣。皇朝開寶六年省。有井陘口。亦曰土門。秦始皇興兵。塞井陘口。漢韓信出井陘。破陳軍。唐李光弼出土門。破史思明軍。皆在此地。有葦山、淖池水。

次畿平山縣。本晉之蒲邑。二漢爲蒲吾縣。屬常山郡。魏、晉皆因之。後徙焉。隋開皇十六年置房山縣。唐天寶十五載改爲平山。

次畿行唐縣。二漢曰南行唐。屬常山郡。魏、晉以後皆因之。隋曰行唐。屬恆山郡。唐屬鎮州。五代屬眞定府。有禹貢恆水。

次畿靈壽縣。漢屬常山郡。魏、晉以後皆因之。後周立蒲吾郡。隋開皇初郡廢。唐屬鎮州。五代時屬眞定府。皇朝熙寧八年省。元祐二年復置焉。有禹貢衛水。

望相州。商王河亶甲居相。此其地也。春秋時屬晉。戰國時屬魏。後屬趙。秦屬邯鄲郡。二漢爲魏郡。曹公爲

魏王都此。晉亦爲魏郡。後趙石季龍前燕慕容儁皆都之。後魏置相州。東魏北齊又都焉。改爲清都尹。後周復置相州及魏郡。隋初郡廢。大業初州廢。復置魏郡。唐爲相州。天寶元年曰鄴郡。故屬天雄軍節度。梁分置昭德軍。而天雄軍亂。遂入于晉。莊宗滅梁。復屬天雄。晉高祖置彰德軍。今縣四。

緊安陽縣。漢爲侯國。曹魏時併入鄴。徐廣晉紀曰。石遵自孚城北入。斬張豹於安陽。後周移鄴縣及相州於安陽故城。遂改爲安陽縣。魏郡治焉。唐爲相州。有韓陵山。高歡破爾朱兆於此。永和鎮。本漢內黃縣地。隋開皇十四年置長樂縣。十八年改曰堯城。屬魏郡。唐屬相州。天祐三年改曰永定。皇朝天聖七年改曰永和。熙寧六年省入安陽。

緊湯陰縣。本二漢蕩陰縣。屬河內郡。晉屬魏郡。後廢焉。隋開皇六年復置。屬汲郡。唐屬相州。正觀元年改爲湯陰。有姜里城。商紂囚問文王之所。

緊臨漳縣。本漢鄴縣地。東魏天平初析置臨漳縣。屬魏郡。後周及隋因之。唐屬相州。魏文侯七年始封此地。以西門豹爲鄴令。民不敢欺。至襄王時史起爲鄴令。引漳水溉鄴。民賴其用。漢高十二年置魏郡。治此。漢末袁紹爲冀州牧。鎮鄴。曹公取之以爲鄴都。作三臺。皆因城爲基。晉亂。胡作石季龍慕容儁皆都之。後魏置相州。東魏北齊又都焉。後周平齊。復置相州。隋文輔政。摠管尉遲迥舉兵不順。章孝寬討平之。乃焚燒鄴縣。徙其居民南遷四十里。以安陽城置鄴縣。屬魏郡。唐屬相州。皇朝熙寧六年省入臨漳。中林慮縣。本漢隆慮縣。屬河內郡。後漢避殤帝名。改曰林慮。晉屬汲郡。後魏置林慮郡。北齊廢之。後復置。

隋開皇初。又廢之。大業初。屬魏郡。唐屬相州。

次府中山府。堯始封於此。春秋時。爲鮮虞。戰國初。爲中山國。後爲魏所并。後又屬趙。秦屬上谷、鉅鹿二郡。漢高帝置中山郡。景帝三年。改爲國。後漢、晉皆因之。後燕慕容垂移都於此。置中山尹。後魏爲中山郡。兼置安州。大唐改爲定州。升義武軍節度。皇朝太平興國元年。改定武軍。政和三年。改中山府中山郡。今縣七。

緊安喜縣。古中山國。魏文侯使樂羊伐取之。以封太子擊。漢爲盧奴縣。城內西北隅有水。淵而不流。色正黑。或云黑水曰盧。不流曰奴。故以取名。後魏皇始二年。滅慕容寶。立安州。道武帝天興三年。改曰定州。北齊改爲安喜。後周置鮮虞郡。隋開皇初。郡廢。置鮮虞縣。大業初。廢安喜入焉。屬博陵郡。唐屬定州。武德四年。改鮮虞曰安喜。故陘邑縣。本漢苦陘。屬中山國。後漢章帝改曰漢昌。魏改曰魏昌。晉元魏因之。北齊廢焉。隋開皇十六年。復置曰隋昌。屬博陵郡。唐武德四年。改曰唐昌。屬定州。天寶元年。改曰陘邑。皇朝康定元年。省入安喜。

緊無極縣。二漢爲母極。屬中山國。晉省之。後魏復置。隋屬博陵郡。唐屬定州。武后改母極爲無極。景福二年。置祁州。周徙治蒲陵。皇朝景德元年。來屬。

上曲陽縣。漢爲上曲陽。屬常山郡。後漢屬中山國。晉屬常山郡。北齊去上字。隋開皇六年。改爲石邑。屬博陵郡。七年。改曰恆陽。唐屬定州。元和十五年。改爲曲陽。有北岳常山在西。

中唐縣。昔堯爲唐侯。國於此。春秋時屬北燕。昭十二年。齊高偃納北燕伯款于唐。是也。漢屬中山國。後漢及晉皆因之。北齊廢焉。隋開皇十六年。復置。屬博陵郡。唐屬定州。舊治中人城。縣西四十里有中人亭。左傳昭十三年。晉荀吳侵鮮虞。及中人。大獲而歸。是也。聖曆元年。徙治今所。

中望都縣。昔堯母慶都所居。有堯山在北。慶都山在南。登堯山見慶都山。故以望都名縣。漢屬中山國。後漢及晉皆因之。北齊省入北平。唐武德四年。復置。屬定州。初治安險故城。正觀八年。徙治今所。

中新樂縣。古鮮虞國子姓。漢爲新市縣。屬中山國。後漢及晉皆因之。後廢焉。隋開皇十六年。置曰新樂縣。屬博陵郡。唐屬定州。

中下北平縣。漢屬中山國。後漢及晉皆因之。後魏置北平郡。北齊郡廢。隋屬博陵郡。唐屬定州。萬歲通天二年。契丹攻之。不下。更名徇忠。神龍元年。復舊。漢曲逆縣。濡水於城北。曲而西流。故曰曲逆。左傳哀四年。齊國夏伐晉。取曲逆。是也。漢高帝過之。曰壯哉。吾行天下。唯洛陽與是耳。詔封陳平爲曲逆侯。屬中山國。後漢章帝醜其名。改曰蒲陰。晉因之。北齊廢入北平。

上邢州。春秋時爲邢國。衛人滅之。戰國時屬趙。秦屬鉅鹿。邯鄲郡。常山王張耳都焉。漢屬趙國。廣平。鉅鹿。常山郡。後漢因之。晉屬鉅鹿。趙國。後趙石勒亦都焉。後魏爲鉅鹿郡。隋置邢州。後爲襄國郡。唐復爲邢州。天寶元年。爲鉅鹿郡。梁升保義軍節度。後唐改爲安國軍。今縣八。

上龍岡縣。故邢國。秦時謂之信都。項羽立張耳爲常山王。居此。更名曰襄國。漢屬趙國。後漢因之。晉省焉。

石勒陷冀州。張賓曰：襄國因山憑險，形勝之地，可都也。太和二年，勒僭號於襄國，其後爲慕容儁所滅。隋開皇九年，改爲龍岡縣。襄國郡漢焉。唐爲邢州理。夷儀嶺在縣北一百五十里。春秋僖五年，邢遷于夷儀，卽此。

上沙河縣。漢襄國縣地。隋開皇十六年，置沙河縣，屬襄國郡。唐武德元年，置温州，四年，州廢，來屬。有湯水。上鉅鹿縣。本漢南縣，屬鉅鹿郡。後漢因之。晉省焉。隋於南縣故城置鉅鹿縣，屬襄國郡。唐武德四年，屬趙州。正觀元年，來屬。有禹貢大陸澤。

上平鄉縣。本鉅鹿縣。秦始皇二十五年，滅趙，以爲鉅鹿郡。秦將王離圍趙王歇於此。漢因之。後漢及晉，徙治廩陶，而鉅鹿屬焉。北齊縣廢。隋置平鄉縣，屬襄國郡。唐屬邢州。皇朝熙寧六年，入省鉅鹿。元祐元年，復置。

上內丘縣。本中丘縣。漢屬常山郡。後漢屬趙國。晉因之。元魏屬南趙郡。隋曰內丘，屬襄國郡。唐武德四年，屬趙州。五年，來屬。有干言山。詩所謂出宿于干，飲餞于言，是也。

中堯山縣。本柏人。春秋晉邑也。漢屬趙國。高帝過趙，欲宿，心動，問縣名何。曰柏人。上曰柏人者，迫於人也。去弗宿。趙相貫高等果有逆謀。後漢及晉皆屬趙國。元魏屬南趙郡。隋屬襄國郡。唐屬邢州。天寶元年，改爲堯山。皇朝熙寧六年，省入內丘。元祐元年，復置。

中南和縣。漢屬廣平國。後漢屬鉅鹿郡。晉省之。後復置。後周置南和郡。隋開皇初，郡廢，屬襄國郡。唐屬邢

州。

中任縣。春秋晉邑也。鄭皇頡奔晉爲任大夫。漢屬廣平國。後漢屬鉅鹿郡。晉省之。隋開皇十六年復置。屬襄國郡。大業初省入南和。唐武德四年復置。屬邢州。皇朝熙寧五年省入南和。元祐元年復置。

雄懷州。禹貢覃懷之地。太行山在焉。春秋時周襄王以陽樊溫原攢茅之國賜晉文公。晉於是始啓南陽。又云武王克商。蘇忿生以溫爲司寇。其田有隕懷是也。戰國時屬魏。兼屬衛。秦滅衛。徙其君角於野王。二世廢角爲庶人。以其地屬三川郡。項羽立司馬卬爲殷王。都此。漢初爲殷國。尋更名河內郡。後漢因之。晉分屬汲郡。後魏置懷州。兼置河內郡。隋初郡廢。而懷州如故。煬帝初州廢。復置河內郡。唐爲懷州。天寶初曰河內郡。今縣三。

緊河內縣。本野王。秦始皇徙衛君角於此。阻其山而保之。漢屬河內郡。後漢因之。晉爲郡治。後魏兼置懷州。隋開皇十六年改野王爲河內。唐爲懷州。西北三十里有邗城。故邗國也。周武王子所封。太行山在西北。武德鎮。本秦縣。始皇東巡。自以武德定天下。因以名縣焉。二漢屬河內郡。晉爲郡治。後置武德郡。隋開皇初郡廢。十八年改州縣爲邢丘。大業初又改曰安昌。屬河內郡。唐武德二年復名武德。屬懷州。皇朝熙寧六年省入河內。漢射犬縣故城在北。平臯縣故城在西。

中武陟縣。本漢懷縣地。隋開皇十六年析置武陟。大業初省焉。唐武德二年置陟州。及修武縣。四年州廢。改修武爲武陟。屬懷州。故懷縣。本禹貢覃懷之地。後爲晉邑。春秋時赤狄伐晉。圍懷是也。二漢爲河內

郡。晉屬河內。隋大業初廢之。後復置。唐正觀元年省入武陟。故城在今縣之西。

上修武縣。本商之寧邑。周武王伐紂。勒兵於寧。更名修武。晉始啓南陽。卽此。故有南陽城。二漢屬河內郡。晉屬汲郡。隋屬河內郡。唐武德四年改修武爲武陟。而別置修武縣於隋修武故城。屬懷州。漢山陽縣。屬河內郡。後漢、晉皆因之。魏阮籍、嵇康等同居山陽。時人號竹林七賢。後縣廢。故城在今縣西北。有雍城。故雍國。周文王子所封。左傳僖二十四年富辰曰。郟、雍、曹、滕、文之昭也。有濁鹿城。漢獻帝爲山陽公居此。

望衛州。春秋時分屬於晉、衛。戰國時屬魏。秦屬三川郡。二漢屬河內郡。魏置朝歌郡。晉改爲汲郡。後魏因之。東魏置義州。後周改爲衛州。又置修武郡。隋初郡廢。煬帝初州廢。復置汲郡。唐爲衛州。天寶元年曰汲郡。今縣四。

中汲縣。故商都牧野之邑。水經注云。太公生於汲城北三十里。有太公泉。泉上有太公廟。相傳云太公之故居也。二漢屬河內郡。魏屬朝歌郡。晉爲汲郡治焉。太康初縣人有發魏安釐王家大得古書。皆簡編科斗文字。所謂汲冢書也。北齊置五城郡。後周廢爲五城縣。隋開皇六年復改爲汲。屬汲郡。唐屬衛州。上獲嘉縣。本漢汲縣地。武帝時南越相呂嘉反。發兵討之。元鼎六年行幸至汲。新中鄉得呂嘉首。因以爲獲嘉縣。屬河內郡。後漢因之。晉屬汲郡。後周置修武郡。隋開皇初郡廢。十六年置殷州。大業初州廢。屬河內郡。唐屬衛州。

緊新鄉縣。隋開皇初析汲獲嘉二縣於古新樂城置。屬河內郡。唐屬衛州。皇朝熙寧六年省入汲。元祐三年復置。東北有故臨清關。東南有故延津關。

中共城縣。故共國。左傳隱元年鄭太叔出奔共是也。二漢屬河內郡。晉屬汲郡。北有共山。隱者孫登所處。北齊縣廢。隋開皇六年復置。曰共城。屬河內郡。唐屬衛州。

望洺州。春秋時爲赤狄所有。後屬晉。戰國時屬趙。秦屬邯鄲郡。漢置廣平國。後漢國廢爲鉅鹿郡之西部。魏置廣平郡。晉及後魏皆因之。後周置洺州。隋大業初置武安縣。後爲洺州。天寶元年曰廣平郡。今縣五。上永年縣。本曲梁。左傳宣十五年晉荀林父敗赤狄于曲梁是也。漢屬廣平國。後漢屬魏郡。魏晉屬廣平郡。北齊省曲梁入廣平縣。廣平漢爲國治。自魏至隋皆爲郡。隋仁壽元年避太子名改廣平曰永年。爲武安郡治。唐爲洺州。漢廣平縣故城在今縣北。臨洺鎮。本漢易陽縣。屬趙國。後漢因之。晉屬廣平郡。東魏屬魏郡。隋開皇六年改易陽曰邯鄲。十年改邯鄲爲臨洺。屬武安郡。唐屬洺州。皇朝熙寧六年省入永年。

望肥鄉縣。漢爲邯溝縣地。屬魏郡。曹魏置肥鄉縣。屬廣平郡。晉因之。東魏省焉。隋開皇十六年復置。屬武安郡。唐屬洺州。漢列人縣。屬廣平國。後漢屬鉅鹿郡。晉屬廣平郡。故城在今縣東北。

緊平恩縣。本漢館陶之別鄉。元帝分置平恩。以封后父許伯爲侯國。屬魏郡。後漢因之。晉及元魏屬廣平郡。隋屬武安郡。唐屬洺州。

中雞澤縣。春秋襄三年公會諸侯同盟于雞澤。漢爲曲梁縣地。隋開皇初置雞澤縣。屬洺州。大業初省入永年。唐武德四年復置。杜預注左傳云。雞澤在曲梁西南。曲梁今永年也。此縣在永年東北。疑非古雞澤地矣。

上曲周縣。漢武帝建元四年置。屬廣平國。東漢屬鉅鹿郡。晉省之。唐武德四年復置。屬洺州。皇朝熙寧三年省入雞澤。元祐四年復置。洺水鎮。本漢斥漳縣。屬廣平國。後漢屬鉅鹿郡。魏晉屬廣平郡。北齊省入平恩。隋復置。改曰洺水。屬武安郡。唐屬洺州。會昌三年省入曲周。

望深州。春秋時屬晉。戰國時屬魏。秦屬鉅鹿郡。漢屬信都國。後漢屬安平國。魏晉爲博陵國。後魏北齊後周爲博陵郡。隋開皇初郡廢。十六年置深州。大業初廢。屬博陵郡。唐武德四年置深州。正觀十七年州廢。先天二年復置。天寶元年曰饒陽郡。今縣五。

望靜安縣。本下博。漢屬信都國。後漢屬安平國。光武避王郎。自饒陽南出。至下博城西。惶惑不知所之。有白衣老父在道旁。指曰。努力。信都爲長安守。去此八十里。光武卽馳赴之。晉亦屬安平國。隋屬信都。唐初屬冀州。後來屬。後周爲州治焉。皇朝太平興國八年置靜安軍。雍熙二年軍廢。還屬。三年縣省。四年復置。改爲靜安。故陸澤縣。本鄆。漢屬鉅鹿郡。後漢作鄆。晉屬趙國。唐先天二年析饒陽鹿城於故鄆城。置陸澤縣。爲深州治所。後周徙治靜安。皇朝雍熙四年省入焉。有禹貢大陸澤。

望東鹿縣。本漢鄆縣地。屬鉅鹿郡。北齊改郡曰安國。隋開皇六年改曰安定。十八年改曰鹿城。屬信都郡。

唐屬深州。天寶十五載，改曰束鹿。五代時屬眞定國。皇朝淳化元年，來屬漢貫縣。故城在西南。
望安平縣。漢屬涿郡。後漢屬安平國。魏、晉爲博陵國治焉。北齊置博陵郡。隋開皇初，郡廢。十六年，置深州。
大業初，州廢。屬博陵郡。唐武德四年，屬深州。正觀十七年，還故屬。先天二年，來屬。
望饒陽縣。漢屬涿郡。後漢屬安平國。魏、晉屬博陵國。後魏屬博陵郡。隋開皇中，分置安平、蕪蕪、二縣。大業
初，省入焉。屬河間郡。唐武德四年，置深州。治此。正觀十七年，州廢。屬瀛州。先天二年，置州。復來屬。而州
徙治陸澤焉。東北有無萋亭。漢光武避王郎於此。

望武彊縣。本武隧。秦破趙將扈輒於武隧。卽此。漢屬河間國。後漢屬安平國。晉因之。後分置武彊縣。元魏
屬武邑郡。隋開皇初，郡廢。省武遂入焉。屬信都郡。唐初，屬冀州。正觀元年，屬深州。十七年，屬冀州。先天
二年，復來屬。開元二年，屬冀州。永泰元年，又來屬。唐末，屬冀州。五代時，又來屬。

輿地廣記卷第十二

〔原闕二十五行每行二十四字〕屬趙州。唐初屬定州。大曆三年屬恆州。皇朝端拱元年來屬。

中深澤縣。漢曰南深澤。屬涿郡。後漢屬安平國。晉屬博陵國。元魏屬博陵郡。北齊廢之。隋開皇六年復置。

曰深澤。屬博陵郡。唐屬定州。景祐二年屬祁州。皇朝熙寧六年省入鼓城。元祐元年復置。

望趙州。春秋時屬晉。戰國屬趙。秦屬邯鄲郡。漢屬恆山。鉅鹿郡。後漢因之。兼置冀州。晉爲趙國。後魏爲趙郡。明帝兼置殷州。北齊改爲趙州。隋改爲欒州。後復爲趙郡。唐爲趙州。天寶元年曰趙郡。皇朝崇寧四年升慶源軍節度。今縣五。

望平棘縣。二漢屬常山郡。晉屬趙國。後魏爲趙郡治焉。隋開皇初郡廢。大業初復置。唐屬趙州。宋子縣。昔秦高漸離匿作於宋子。擊筑而歌。卽此地。漢屬鉅鹿郡。後漢省之。元魏復置。屬鉅鹿郡。隋大業初省入平棘。故城在今縣北。

望寧晉縣。本廩陶縣地。漢屬鉅鹿郡。後漢、晉、元魏爲郡治焉。隋屬趙郡。唐屬趙州。天寶元年改爲寧晉。上臨城縣。本晉邑。左傳哀四年趙稷奔臨。是也。二漢爲房子縣。屬常山郡。晉爲趙國治焉。元魏屬趙郡。北齊省之。隋開皇六年復置。屬趙郡。唐屬趙州。天寶元年改爲臨城。有泚水。韓信斬成安君於此。

中隆平縣。本廣阿。漢屬鉅鹿郡。後漢省之。元魏復置。屬趙郡。兼置殷州。後改爲趙州。隋開皇十六年置欒

州仁壽元年改廣阿爲象城。大業初州廢。改縣爲大陸。屬趙郡。唐屬趙州。武德四年復改爲象城。天寶元年改爲昭慶。以有建初啓運二陵故也。皇朝開寶五年改爲隆平。熙寧六年省入臨城。元祐元年復置。

中高邑縣。本曰鄆。晉邑也。左傳哀四年齊國夏伐晉。取鄆。卽此。漢屬常山郡。後漢光武卽位於此。更名高邑。爲冀州刺史治焉。晉屬趙國。元魏及隋屬趙郡。唐屬趙州。栢鄉鎮。漢縣。屬鉅鹿郡。後漢省之。隋開皇十六年復置。屬趙郡。唐屬趙州。皇朝熙寧五年省入高邑。贊皇鎮。隋開皇十六年置。取贊皇山爲名。屬趙郡。唐屬趙州。皇朝熙寧五年省入高邑。

下保州。五代以上地理與莫州同。皇朝置保塞軍。後升爲保州。政和三年爲清苑郡。縣一。

望保塞縣。本漢涿郡之樊輿。中山之北新城地。後廢置不常。北齊省入永寧縣。改爲樂鄉。隋開皇十八年改爲清苑。屬河間郡。唐屬瀛州。景雲二年屬莫州。皇朝建隆元年以縣地置保塞軍。太平興國六年升爲保州。改清苑爲保塞縣。

同下州安肅軍。自五代以上地理與易州同。皇朝置靜戎軍。後改爲安肅軍。今縣一。

中安肅縣。本易州遂城縣地。皇朝太平興國六年以遂城之宥戎。改置靜戎軍及靜戎縣。景德元年改軍與縣皆爲安肅焉。

同下州永寧軍。自五代以上地理與中山府同。皇朝置寧邊軍。後改爲永寧軍。今縣一。

望博野縣。本蠡吾。漢屬涿郡。後漢屬中山國。桓帝父蠡吾侯葬此。追尊爲孝崇皇。其陵曰博陵。因分置博陵縣。晉改曰博陸。爲高陽國治。後魏改爲博野。北齊省蠡吾入焉。隋屬河間郡。唐武德四年。置蠡州。正觀元年。州廢。屬瀛州。永泰中。屬深州。周屬定州。皇朝熙寧四年。以博野縣地置寧邊軍。景德元年。改永定。天聖四年。改永寧。

同下州廣信軍。自五代以上。地理與易州同。皇朝置威虜軍。後改爲廣信軍。今縣一。

中遂城縣。本北新城。漢屬中山國。後漢屬涿郡。晉屬高陽國。後曰武遂。北齊改曰新昌。隋開皇十八年。改曰遂城。屬上谷郡。唐屬易州。皇朝太平興國六年。置威虜軍。景德元年。改曰廣信。

中下州順安軍。自唐以上。地理與瀛州同。如意元年。析河間縣置武興。屬瀛州。神龍元年。更名唐興。景雲二年。屬莫州。五代時屬瀛州。後廢焉。皇朝太平興國七年。以廢唐興縣地置唐興寨。淳化三年。升爲順安軍。今縣一。

中高陽縣。漢屬涿郡。後漢屬河間國。晉屬高陽國。後置高陽郡。隋開皇初。郡廢。十六年。置蒲州。大業初。州廢。屬河間郡。唐武德四年。置蒲州。正觀元年。州廢。屬瀛州。皇朝至道三年。屬順安軍。

河北路化外州

安東上都護府。春秋戰國。屬燕。秦立遼東。二漢因之。漢末。爲公孫度所據。魏晉。亦爲遼東郡。後慕容廆居之。後魏時。高麗國都其地。唐總章元年。李勣平高麗。得城百七十六。分其地爲都督府九州四十二縣。一

百置安東都護府於平壤城以統之。用其酋渠爲都督刺史縣令。上元三年徙遼郡故城。儀鳳二年又徙新城。聖曆元年更名安東都督府。神龍元年復故名。開元二年徙于平州。天寶二年又徙于遼西故郡城。至德後廢。領羈縻州十四。

新城州都督府 遼城州都督府 哥勿州都督府

建安州都督府 南蘇州 木底州

蓋牟州 代那州 倉巖州

磨米州 積利州 黎山州

延津州 安市州

大都督幽州。武王封召公奭於燕。都此。及秦滅燕。以爲上谷郡。漢高帝分立燕國。昭帝元鳳元年爲廣陽郡。宣帝太始元年更爲國。東漢建武中併入上谷郡。永平八年復立爲郡。兼立幽州。魏晉爲燕國。前燕慕容儁初都其地。元魏立幽州及燕郡。北齊置東北道行臺。後周平齊。置摠管府。隋開皇初郡廢。大業初府廢。立涿郡。唐武德元年爲幽州。天寶元年曰范陽郡。升爲盧龍軍。領縣九。

望薊縣。周武王克商。封帝堯之後於薊。又封召公於北燕。其後燕國都薊。與六國俱稱王。爲秦所滅。屬上

谷郡。二世時韓廣自立爲燕王。項氏封臧荼。漢高帝封盧綰。相繼爲王。皆都其地。後改爲廣陽國。東漢爲郡。兼立幽州。魏晉爲燕國。前燕慕容儁自和龍徙都於此。後又徙鄴。元魏亦爲幽州及燕郡。隋煬帝

立涿郡唐爲幽州

望幽都縣本薊縣地隋於營州之境汝羅故城置遼西郡以處粟末靺鞨降人武德元年曰燕州領遼西、
盧河、懷遠三縣是年省盧河六年自營州遷于幽州城中以首領世襲刺史正觀元年省懷遠開元二
十五年徙治幽州北桃谷山天寶元年曰歸德郡建中二年爲朱滔所滅因廢爲縣與薊分治郭下在
府北一里

上廣平縣天寶元年析薊置三載省至德後復置

上路縣二漢屬漁陽郡晉屬燕國元魏屬漁陽後爲郡治隋開皇初郡廢屬涿郡唐武德二年自無終徙
漁陽郡於此置玄州正觀元年州廢來屬

上武清縣本雍奴二漢屬漁陽郡晉屬燕國隋屬涿郡唐屬幽州天寶元年更名

緊永清縣本武隆唐如意元年析安次置景雲元年曰會昌天寶元年更名

上安次縣漢屬渤海郡東漢屬廣陽郡晉屬燕國元魏屬燕郡隋屬涿郡唐屬幽州

望良鄉縣漢屬涿郡晉屬范陽國元魏屬燕郡隋屬涿郡唐屬幽州聖曆元年改曰固節神龍元年復故
名有大防山

望昌平縣漢屬上谷郡東漢屬廣陽郡晉屬燕國元魏省後置東燕州及平昌郡後周州郡皆廢後又置
平昌郡隋開皇初郡廢屬涿郡唐因之北十五里有軍都陁西北三十五里有納款關卽居庸故關亦

謂之軍都關。其北有防禦軍。古夏陽川也。有狼山。

上涿州。歷代地理與幽州同。漢高帝立涿郡。東漢因之。魏文帝更名范陽郡。晉武帝改爲范陽國。以封宣帝弟子綏爲王。元魏北齊後周復爲郡。隋開皇初郡廢。屬涿郡。唐大曆四年節度使朱希彩表分幽州置後曰涿郡。領縣四。

上范陽縣。本涿縣。漢屬涿郡。魏范陽郡。晉曰范陽國。元魏以後復爲郡。隋開皇初廢。屬涿郡。唐武德七年改涿縣曰范陽。屬幽州。後分置涿州。

上固安縣。本漢方城縣地。屬廣陽國。東漢屬涿郡。晉屬范陽國。元魏屬范陽郡。□□唐正觀元年自章信城移固安縣治此。屬幽州。後來屬。

上新昌縣。漢屬涿郡。東漢省之。唐大曆四年析固安復置。

上新城縣。本漢涿縣地。唐大和六年析范陽置。有督亢陂。溉田。號爲膏腴。燕太子丹使荆軻以督亢地圖獻秦王。卽此。

上易州。歷代地理與幽州同。秦屬上谷郡。二漢屬涿郡。魏屬范陽郡。晉屬范陽國。元魏復屬范陽郡。隋開皇初立易州及黎郡。尋廢。大業初州廢。立上谷郡。唐爲易州。天寶元年曰上谷郡。領縣四。

上易縣。本漢故安縣。屬涿郡。魏晉元魏屬范陽郡。北齊省故安縣。隋立易州及易縣。又立上谷郡。唐因之。漢故安縣故城在今縣南。易水所出。燕太子丹送荆軻入秦。祖道於水上。軻起爲壽歌曰。風蕭蕭兮易。

水寒壯士一去兮不復還卽此。

上涑水縣。本二漢迺縣。屬涿郡。晉屬范陽國。元魏屬范陽郡。後周省之。隋開皇元年。置范陽縣。屬易州。六年。改曰固安。八年。省。十年。置永陽縣。十八年。改爲涑水。唐因之。

中滿城縣。漢北平縣地。屬中山國。元魏置永樂縣。爲樂浪郡。僑治北齊屬黎郡。隋開皇三年。郡廢。屬易州。唐天寶元年。更名滿城。有郎山。

中下五回縣。唐開元二十三年。析易縣置。并置樓亭、板城。二縣。天寶後。二縣省。

下檀州。歷代地理與幽州同。秦爲漁陽。右北平。二郡地。二漢因之。元魏立密雲、廣陽、安樂。三郡。兼立安州。北齊廢密雲、廣陽。二郡入安樂。後周改州爲玄州。隋開皇初。郡廢。十六年。州徙。尋立檀州。大業初。州廢。復爲安樂郡。唐武德元年。復爲檀州。天寶元年。曰密雲郡。領縣二。

中密雲縣。本二漢庠奚縣地。屬漁陽郡。後省。元魏立密雲郡及密雲縣。北齊郡廢。屬安樂郡。省白檀、要陽。二縣入焉。隋屬檀州。後屬安樂郡。唐自燕樂徙檀州治焉。元魏又立安樂郡。領安市、土垠。二縣。北齊省。土垠入安市。後周省安市入密雲。隋開皇初。郡廢。故白檀、要陽。二縣。漢屬漁陽郡。東漢省之。元魏復置。分屬故土垠縣。二漢及晉。屬右北平郡。元魏屬漁陽郡。後分屬。

中燕樂縣。元魏置。屬廣陽郡。兼立安州。北齊郡廢。屬安樂郡。省廣興、方城。二縣入焉。後周改州曰玄州。隋徙玄州。尋立檀州。後爲安樂郡。唐屬檀州。

下薊州。歷代地理與幽州同。秦爲漁陽、右北平二郡地。漢因之。後廢。隋文帝徙玄州於此。并立摠管府。煬帝初置漁陽郡。唐武德元帝郡廢入幽州。開元十八年分立薊州。天寶元年曰漁陽郡。領縣三。

中漁陽縣。漢舊縣。屬漁陽郡。晉省之。復置。元魏屬漁陽郡。後又省。隋末復置。唐屬幽州。開元十八年析置薊州。有鮑丘水。

中三河縣。唐開元四年析潞州置。

中玉田縣。本無終。春秋無終子國也。二漢及晉屬右北平郡。元魏屬漁陽郡。後省。北齊復置。隋爲漁陽郡。治。後省。唐武德二年復置。屬幽州。正觀元年省。乾封二年復置。萬歲通天元年更名神龍元年屬營州。開元四年還屬幽州。八年屬營州。十一年又屬幽州。十八年來屬。搜神記曰。雍伯。雒陽人。性至孝。父母沒。葬之於無終山。山高八十里。而上無水。雍伯置飲焉。有人就飲。與石一斗。令種之。□□於種石處。名曰玉田。後因以名縣。故徐無縣。二漢及晉屬右北平郡。元魏屬漁陽郡。後周廢入無終。

上媯州。歷代地理與幽州同。秦立上谷郡。二漢因之。晉太康中分立廣寧郡。元魏曰廣寧郡。北齊立北燕州。及長寧、永豐二郡。後周去北字。隋開皇初郡廢。大業初州廢入涿郡。唐武德七年平高開道立北燕州。正觀八年更名天寶元年曰媯川郡。領縣一。

上懷戎縣。本二漢潘縣。屬上谷郡。晉屬廣寧郡。北齊改置懷戎縣。及立北燕州。後周曰燕州。唐爲北燕州。後改曰媯州。天寶中析置媯川縣。尋省。媯水貫中。故涿鹿縣。二漢屬上谷郡。晉屬廣寧郡。後省。昔黃帝

與蚩尤戰於涿鹿。卽此涿鹿城東一里有阪泉。黃帝與炎帝戰於阪泉。卽此東北五十里有居庸塞。東連盧龍、碣石。西屬太行。常山實天下之險。有鐵門關。有磨笄山。趙襄子滅代。其姊磨笄自殺。因爲名。代人憐之。爲立祠。

下平州。商時爲孤竹國。春秋時山戎。肥子。二國地。戰國屬燕。秦爲遼西。右北平。二郡地。二漢因之。晉屬遼西郡。元魏屬遼西。北平。二郡。兼立平州。北齊廢遼西入北平。隋開皇初。郡廢。大業初。州廢。復爲北平郡。唐武德二年。曰平州。天寶元年。曰北平郡。領縣三。

中盧龍縣。本肥如。春秋晉滅肥。肥子奔燕。受封於此。故曰肥如。二漢及晉屬遼西郡。元魏爲郡治。兼立平州。北齊屬北平郡。隋開皇六年。省肥如入新昌。十八年。改新昌曰盧龍。爲郡治焉。唐爲平州。故令支縣。二漢屬遼西郡。晉省之。有孤竹故城。伯夷叔齊讓國於此。漢靈帝時。遼西太守廉翻夢人謂己曰。余孤竹君之子。伯夷之弟也。遼海漂吾棺槨。聞君仁善。願見藏覆。明日視之。水上有浮棺。吏笑者無疾而死。於是改葬之。爲立祠焉。有盧龍塞道。自無終縣東出。渡濡水。向林蘭陁。東越清陁。至凡城。二百許里。自凡城東北出。趨平疋故城。可百八十里。向黃龍則五百里。故魏志言田疇引軍出盧龍塞。逕白檀。歷平疋。登白狼。望柳城。是也。有濡河。

中石城縣。本臨渝。二漢屬遼西郡。晉省入陽樂。隋末。復置。唐武德七年。省。正觀十五年。復置。萬歲通天二年。更名。故桑縣。漢屬遼西郡。故驪成縣。漢屬右北平郡。東漢皆省焉。有禹貢碣石山。秦皇漢武皆登之。

以望巨海。其石碣然而立。在海旁。故名之。晉太康地志云。秦築長城。所起自碣石。在今高麗界。非此碣石也。有臨渝關。

中馬城縣。本海陽縣地。二漢及晉皆屬遼西郡。唐開元二十八年。置馬城縣。以通水運。

上都督府營州。商時孤竹國地。春秋時屬山戎。戰國屬燕。秦屬遼西郡。二漢及晉因之。前燕慕容皝自徙河之青山。徙都于此。後燕慕容寶。北燕馮跋。亦都焉。元魏立營州。領昌黎、建德、遼東、樂浪、冀陽、營丘、六郡。北齊廢昌黎、遼東、樂浪、營丘。併入建德、冀陽二郡。後周平齊。其地爲高寶寧所據。隋開皇初克之。大業初州廢。立遼西郡。唐武德元年。曰營州。萬歲通天元年。爲契丹所陷。聖曆二年。僑治漁陽。開元五年。又還治柳城。天寶元年。曰柳城郡。領縣一。

中柳城縣。漢屬遼西郡。爲西部都尉治。東漢省。慕容皝以柳城之北。龍山之南。福德地也。乃營建都邑。改柳城曰龍城。而徙居於此。時有黑龍白龍各一。鬪於龍山。皝親觀之。祭以太牢。二龍交首。嬉翔解角而去。皝悅。號新宮曰和龍宮。後慕容寶馮跋相繼都焉。元魏立營州及昌黎郡。北齊廢郡。隋開皇初。改龍城縣曰龍山。十八年。復改曰柳城。後立遼西郡。唐曰營州。漢交黎縣。屬遼西。故城在東南。徒河縣。屬遼西。故城在東北。青山。慕容廆所據。在東百九十里。棘城。高陽氏之墟。在東南百七十里。鮮卑山。在東南二百里。有鷄鳴山、白狼水。

輿地廣記卷第十三

陝西永興軍路上

次府京兆府。本周室所居。謂之宗周。平王東遷。地入于秦。至孝公。徙都焉。始皇置內史。漢元年。屬塞國。二年。爲渭南郡。高帝都此。九年。復爲內史。武帝建元六年。分爲右內史。太初元年。更爲京兆尹。王莽旣敗。更始赤眉相繼據之。後漢都洛陽。仍以此爲京兆尹。獻帝亦嘗都此。魏改尹爲太守。後改爲秦國。復爲京兆國。晉爲京兆郡。兼置雍州。愍帝亦都之。其後爲劉曜符堅姚興所據。後魏亦爲京兆郡。兼置雍州。後周復爲京兆尹。隋初。置雍州。後改爲京兆郡。唐初。爲雍州。開元元年。改爲京兆府。後周、隋、唐。皆爲帝都。昭宗遷洛。廢爲佑國軍。梁初。改京兆府曰大安。佑國軍曰永平軍。後唐復爲西京。晉廢爲晉昌軍。漢改曰永興軍。今縣十五。

次赤長安縣。本宗周之地。文王作豐。今縣西北靈臺鄉豐水上是也。武王作鎬。今昆明池北鎬陂是也。秦爲咸陽縣地。漢高帝五年。置長安縣。惠帝元年。城之。經緯各長十五里。城中皆屬長安。今長安故城是也。後漢因之。晉及後魏。爲京兆郡。後周都焉。隋開皇三年。自漢長安故城東南移二十里。置新都。前直子午谷。後枕龍首山。左臨灊岸。右抵灃水。唐因之。有終南山。灃水。鎬水。

次赤萬年縣。本漢長安縣地。後周始於長安城中置萬年縣。取漢縣爲名。隋文帝龍潛。封號大興。開皇三

年改曰大興縣。唐武德元年復故名。漢杜陵縣。故杜伯國。周成王滅唐而遷之於此。宣王以無罪殺杜伯。杜伯之神射王于縞。故有周右軍將杜主祠。秦武公十一年縣之。漢宣帝以杜東原上爲初陵。故更名杜爲杜陵。屬京兆尹。後漢及晉因之。後魏改曰杜城。後周廢之。故城在今縣南。漢霸陵縣。本秦芷陽。文帝葬其上。改曰霸陵。陵在霸水之西。霸水故滋水也。秦穆公更名以顯霸功。晉曰霸城。後魏曰西霸城。後周廢之。故城在今縣東南。漢南陵縣。故城在今縣東南。有白鹿原。長樂陂。本滻坡。隋文帝更名。有灞水。滻水。

次畿鄠縣。古有扈國。有甘水出南山甘谷。北入渭。秦孝文王起萇陽宮於此。二漢屬右扶風。晉屬始平郡。隋屬京兆郡。唐因之。

次畿藍田縣。漢屬京兆尹。後漢、晉皆因之。後周置藍田郡。尋廢。隋屬京兆郡。唐因之。南有藍田關。故嶢關也。漢高帝自武關攻秦。用張良計。破秦於此。

次畿咸陽縣。秦孝公十二年作咸陽。築冀闕。自櫟陽徙都之。其後始皇以爲咸陽人多。先王之宮庭小。吾聞豐鎬之間。帝王之都也。乃營作朝宮。渭南上林苑中。先作前殿阿房。東西五百步。南北五十丈。爲複道。自阿房渡渭。屬之咸陽。以象天極。閣道絕漢。抵營室。云。後項籍屠咸陽。燒其宮室。漢高帝元年更名新城。七年罷屬長安。武帝元鼎三年。別爲渭城縣。屬右扶風。後漢省之。唐武德元年。析涇陽。始平。置咸陽縣。屬京兆府。秦咸陽故城在縣東十五里。漢渭城故城在今縣東北。故杜郵也。秦白起遷陰密。出咸

陽西門十里至杜郵。賜死。卽此地。漢長陵縣。高帝所葬。屬左馮翊。後漢屬京兆尹。晉省之。故城在今縣境。

次畿醴泉縣。漢谷口縣。屬左馮翊。故城在今縣北。鄭子真。其縣人也。後漢省之。後魏置寧夷縣。西魏置寧夷郡。後周改爲秦郡。後廢。隋開皇十八年。改縣曰醴泉。屬京兆郡。唐因之。有九畷山。

次畿涇陽縣。本秦故縣。昭王封其弟涇陽君於此。二漢及晉爲池陽縣地。後置涇陽縣。及咸陽郡。隋開皇初。郡廢。屬京兆郡。唐因之。有焦護澤。謂之瓠中。

次畿櫟陽縣。秦獻公自雍徙居櫟陽。而天雨金。周太史儋見獻公。曰。周故與秦國合而別。別五百歲復合。七十歲而霸王出焉。項羽立司馬欣爲塞王。都此。漢高帝初取。亦嘗居之。太上皇葬櫟陽。起萬年陵。因分置萬年縣。後漢省櫟陽入萬年。晉屬京兆郡。後周徙萬年置於長安城中。而移廣陽縣置於故萬年城。隋開皇三年。改萬年爲大興。而復改廣陽爲萬年。屬京兆郡。唐武德元年。復改大興爲萬年。而改萬年爲櫟陽。屬京兆府。

次畿高陵縣。本秦故縣。昭王封弟高陵君於此。二漢屬左馮翊。魏文帝改曰高陸。晉屬京兆郡。隋大業初。復改曰高陵。屬京兆郡。唐屬京兆府。

次畿興平縣。本周犬丘。懿王都之。秦改曰廢丘。項羽立章邯爲雍王。都此。漢高帝三年。更名槐里。屬右扶風。晉置始平郡。後置扶風郡。而改槐里曰始平縣。隋開皇初。郡廢。屬京兆郡。唐屬京兆府。景龍四年。中

宗送金城公主入蕃。別於此。因改曰金城縣。至德二年。改曰興平。

次畿臨潼縣。驪山在南。故驪戎國。周幽王遇犬戎之禍於此。秦曰驪邑。漢高帝七年。太上皇思東歸。高帝於是改築城寺街里。以象豐徙。豐民以實之。命曰新豐。屬京兆尹。後漢及晉皆因之。唐屬京兆府。垂拱二年。改曰慶山。神龍元年。復故名。三年。析新豐。萬年。置會昌縣。七年。省新豐入焉。改曰昭應。屬京兆府。皇朝大中祥符八年。改曰臨潼。唐置宮在驪山下。咸亨二年。始名溫泉宮。天寶元年。更名驪山曰會昌山。六年。更名溫泉曰華清宮。宮治湯井爲池。環山列宮室。又築羅城。置百司及十宅焉。有鴻門。漢高帝會項羽於此。有戲水。陳涉遣將周章西入關。至戲。是也。

次畿武功縣。本郿邑。后稷所封。郿亦作縈。漢屬右扶風。後漢省入郿。武功亦漢縣。本在渭南。屬右扶風。後漢因之。晉屬始平郡。後周置武功郡。建德中。郡廢。而置武功於故縈城。今縣是也。隋屬京兆郡。唐屬京兆府。漢美陽縣。屬右扶風。後漢及晉皆因之。後周省入武功。故城在今縣北七里。有太壹山。禹貢所謂終南有垂山。禹貢所謂敦物也。

次畿乾祐縣。本安業縣。唐萬歲通天元年。析商州之豐陽置。景龍三年。屬雍州。景雲元年。屬商州。乾元元年。改爲乾元縣。漢改曰乾祐。屬京兆府。

次畿奉天縣。唐文明元年。析醴泉。始平。好時。武功。永壽置。以奉乾陵。陵在北五里。屬京兆府。德宗避涇卒之亂。出居於此。爲朱泚所圍。賴渾瑊扞城。得以不陷。乾寧二年。以縣置乾州。皇朝熙寧五年。州廢。復來。

屬

次畿終南縣。本漢整屋縣地。唐武德二年。析置終南縣。正觀八年。省。後爲清平鎮。皇朝大觀二年。復置。次府河中府。周時爲魏國。春秋時屬晉。以封大夫畢萬。戰國時魏惠王徙都大梁。而其地入秦。後置河東郡。二漢。晉。皆因之。兼置雍州。後魏改爲秦州。後周改爲蒲州。隋初。郡廢。煬帝初。州廢。復置河東郡。唐初。爲蒲州。開元八年。置中都。爲府。是年。罷都爲州。乾元三年。復爲河中府。尋罷。後爲河中節度。皇朝太平興國七年。改爲護國軍。今縣八。

次赤河東縣。故蒲坂。舜之所都。有歷山。媯汭水。春秋文十二年。晉人秦人戰于河曲。在縣南。戰國屬魏。秦昭襄王四年。取蒲坂。後屬河東郡。二漢及晉因之。後魏。後周。皆爲郡焉。隋開皇初。郡廢。十六年。析置河東縣。大業初。復置郡。省蒲坂入焉。唐初。爲蒲州。後爲河中府。

次畿臨晉縣。本桑泉。左傳僖二十四年。晉公子重耳濟河入桑泉。是也。漢爲解縣地。隋開皇十六年。析猗氏置桑泉縣。屬河東郡。唐屬河中府。天寶十三年。改爲臨晉。解本春秋時解梁。二漢及晉屬河東郡。後徙焉。故城在今縣東南。

次畿猗氏縣。本令狐。左傳僖二十四年。晉公子重耳濟河。圍令狐。是也。縣南對澤。卽猗頓之故居。頓。魯之窮士。聞朱公富。往問術焉。朱公曰。子欲速富。當畜五牝。於是乃適西河。大畜牛羊。十年之間。其畜不可計。貨擬王公。故遂以猗氏名縣。漢屬河東郡。後漢。晉。皆因之。西魏改曰梁泉。後周復故。隋屬河東郡。唐

屬河中府。有郇城。周文王子所封。詩所謂郇伯勞之者也。

次畿虞鄉縣。本漢解縣地。元魏分置虞鄉縣。隋因之。唐武德元年。改虞鄉爲解縣。而於解西五十里別置

虞鄉縣。屬蒲州。後屬河中府。

次畿萬泉縣。唐武德三年。析稷山、安邑、猗氏、汾陽、龍門置。屬絳州。大順二年。來屬。

次畿龍門縣。古耿國。商祖乙自相徙居之。春秋時。晉獻公滅耿。以賜大夫趙夙。戰國時屬魏。爲皮氏縣。秦

惠王渡河取皮氏。二漢屬河東郡。魏晉屬平陽郡。後魏改爲龍門。兼置郡。隋開皇初。郡廢。屬河東郡。唐

武德二年。秦州徙治此。正觀十七年。州廢。屬絳州。元和初。來屬。有龍門山。禹貢所謂導河積石。至于龍

門。是也。

次畿滎河縣。本魏之汾陰縣。秦惠王渡河取汾陰。卽此。漢屬河東郡。武帝立后土祠於汾陰。雖上親望拜。

如上帝禮。後漢亦屬河東郡。晉省之。後魏復置。兼置汾陰郡。隋開皇初。郡廢。屬河東郡。唐武德元年。改

曰秦州。正觀十七年。州廢。來屬。開元十年。明皇祀后土。獲寶鼎。因改爲寶鼎縣。皇朝大中祥符四年。改

寶鼎縣曰滎河。置慶成軍。熙寧元年。廢軍。以滎河來屬。

永樂縣。古魏國。詩序所謂魏地狹隘者也。春秋時。晉獻公滅魏。以賜大夫畢萬。漢爲河北縣。屬河東郡。魏、

晉皆因之。後縣東徙焉。唐武德元年。分芮城置永樂縣。以永樂澗爲名。屬芮州。州廢。屬鼎州。正觀八年。

來屬。後又屬虢州。神龍元年。復來屬。禹貢雷首山在北。山南曰首陽。伯夷、叔齊隱居其下。

大都督府陝州。昔周召分陝之所。春秋虢國之地。所謂北虢也。戰國屬韓。秦屬三川郡。二漢及晉皆屬弘農郡。後魏置弘農郡。兼置陝州。隋開皇初。郡廢。大業初。州廢。屬河南郡。義寧元年。置弘農郡。唐武德元年。曰陝州。天寶元年。更曰陝郡。天祐元年。昭宗居陝。升爲興唐府。哀帝初。復故號。曰保義軍。皇朝太平興國元年。改保平軍。今縣八。

上陝縣。古虢國。所謂上陽也。故城在今縣東。漢屬弘農郡。後漢及晉皆因之。後魏置陝州及弘農郡。後周因之。隋屬河南郡。唐復爲陝州。有焦國。周武王封炎帝之後於此。有莘原。魯莊公三十二年。有神降于莘。卽此石壕鎮。本崞縣。後魏置。唐武德八年。來屬。正觀十四年。改爲硤石縣。姚崇。其邑人也。皇朝熙寧六年。省爲鎮。有禹貢底柱山。山有三門。河所經。唐太宗勒銘於此。

上平陸縣。本虞虢之地。吳山在西。上有虞城。舜始封於此。至周武王時。封太王子仲雍之後。是爲虞公。春秋時。晉所滅。虢下陽邑在東北。漢爲太陽縣。屬河東郡。後漢及晉皆因之。後廢焉。而置河北縣及河北郡。隋開皇初。郡廢。屬蒲州。唐正觀元年。來屬。天寶元年。太守李濟物開三門以利運漕。得古刃。有篆文。曰平陸。因更名。有傅巖在北。卽傅說築處。有茅津在西南。對陝城。魯文公時。秦伯伐晉。晉人不出。遂自茅津濟。卽此。

上夏縣。本夏禹之都。漢爲安邑縣地。後置夏縣及安邑郡。隋開皇初。郡廢。屬虞州。唐正觀十七年。屬絳州。乾元三年。來屬。有巫咸山。蓋神巫所遊。故山得其名。

上靈寶縣。古函谷關。秦人恃之以爲險固。漢武帝徙關于新安。而以故關置弘農郡及弘農縣。東漢晉因之。元魏置弘農郡。隋開皇十六年。置桃林縣。屬洛州。唐武德元年。來屬天寶元年。得天寶靈符於古函谷關。因改元。兼改縣。靈寶關在縣西南十里。老子西遊至關。關令尹喜先見其氣。知真人當過。物色而得之。曰。子將隱矣。強爲我著書。孟嘗君自秦逃歸。夜半至關。其客效鷄鳴。遂得出關。戰國時。九國仰關而攻秦。秦人開關延敵。九國之師。逡巡而不敢進。曹陽亭在縣東十三里。秦章邯敗陳涉將周文於此。漢獻帝歸至此。爲李傕郭汜所逼。遂露次焉。曹公改爲好陽縣。西南境卽古桃林之野。東北有桑田亭。春秋。虢公敗戎于桑田。卽此。

中下芮城縣。本魏國地。魯桓公時。芮伯萬爲母姜氏所逐。自今馮翊縣界出居于魏。卽此地也。漢爲河北縣地。後周改曰芮城。置永樂郡。郡後廢焉。隋屬河東郡。唐武德二年。置芮州。正觀元年。州廢。來屬。

中下湖城縣。本曰湖。黃帝采首山之銅。鑄鼎於荆山下。鼎旣成。有龍垂胡頰。下迎黃帝。後世因名其處曰鼎湖。漢武帝改曰湖。屬京兆尹。戾太子敗亡。至此自殺。後漢屬弘農郡。晉因之。後曰湖城。隋改爲閿鄉縣。唐屬虢州。皇朝太平興國三年。來屬縣之南境諸山。東北連函谷。西北連潼關。皆古桃林之地。

中下閿鄉縣。本漢湖縣之閿鄉。後湖城縣徙此焉。隋開皇十六年。改爲閿鄉。屬河南郡。唐武德元年。屬鼎州。正觀八年。屬虢州。皇朝太平興國三年。來屬。漢戾園在今縣東南。

中都督府延安府。春秋白狄之地。秦屬上郡。漢初爲翟國。尋復爲上郡。後漢因之。漢末。羌胡大擾。戶口流

散郡縣皆廢焉。後魏置東夏州。西魏改曰延州。置總管府。隋置延安郡。唐復爲延州。梁號忠義軍。後唐改彰曰武。皇朝升延安府。今縣七。

中膚施縣。秦屬上郡。二漢因之。後廢焉。隋大業三年。置延安郡。唐爲延州。豐林鎮。本漢臨河縣地。元魏置廣武縣。隋改曰豐林。屬延安郡。唐屬延州。皇朝熙寧五年。省入膚施。金明寨。本秦高奴縣。項羽立董翳爲狄王。都高奴。卽此。漢屬上郡。東漢因之。漢末廢焉。元魏置廣樂縣。隋改曰金明。屬延安郡。後廢焉。唐武德二年。析膚施復置。以縣置北武州。正觀二年。州廢。來屬。皇朝熙寧五年。省入膚施。

中延川縣。漢臨河縣地。屬朔方郡。東漢省之。西魏置縣。曰文安。及置郡。隋開皇初。郡廢。改縣爲延川。屬延安郡。唐屬延州。延水鎮。本安民縣。唐武德二年。析延川置。皇朝熙寧八年。省入延川。

中延長縣。漢膚施縣地。西魏置延安縣。隋屬延安郡。唐屬延州。廣德二年。改爲延長。

中門山縣。後周置。隋大業初。省入汾川。唐武德三年。復置。屬丹州。廣德二年。來屬。

中臨真縣。漢高奴縣地。元魏置臨真縣。西魏又置。伯水郡。真川縣。後周郡廢。隋大業初。省真川入臨真。屬延安郡。唐屬延州。

中敷政縣。本因城。元魏置。後周廢。尋又置。隋屬延安郡。唐武德二年。徙治金城鎮。更名金城。正觀八年。屬延州。天寶元年。更名敷城。

中下甘泉縣。唐武德元年。分洛交置。伏陸。屬鄜州。天寶元年。改爲甘泉。後屬延州。

望同州。周爲芮伯韓侯國。春秋時屬秦晉。戰國時屬秦魏。秦屬內史。項羽分屬塞國。漢高帝置河上郡。景帝分爲左內史。武帝改爲左馮翊。東漢因之。魏除左字。但爲馮翊郡。晉及元魏皆因之。兼置華州。西魏改曰同州。取禹貢所謂漆沮旣從澧水攸同以名焉。隋初郡廢。大業州廢。復置馮翊郡。唐武德元年曰同州。天寶元年曰馮翊郡。梁曰忠武軍。皇朝太平興國七年升定國軍。今縣六。

緊馮翊縣。本芮國。漢爲臨晉縣地。屬左馮翊。元魏置華陰縣。西魏改曰武鄉里。及郡。隋開皇初郡廢。大業初改縣曰馮翊。置郡。唐爲同州。有沙苑。周文帝敗齊神武于此。有洛水。商原。所謂商顏。

緊澄城縣。漢徵縣地。屬左馮翊。左傳所謂取北徵是也。徵澄音相近。東漢省之。元魏置澄城縣及澄城郡。隋開皇初郡廢。屬馮翊郡。唐屬同州。

緊朝邑縣。故荔戎國。秦厲共公獲之。更名臨晉。以築高壘。臨晉國故也。漢屬左馮翊。東漢因之。晉爲馮翊郡。治焉。元魏置南五泉縣。西魏改曰朝邑。隋屬馮翊郡。唐屬同州。臨晉縣故城在今縣西南。

上郃陽縣。古莘國。其女太姒爲周文王后。詩所謂在郃之陽是也。漢爲郃陽縣。屬左馮翊。東漢、晉、隋皆因之。唐屬同州。夏陽鎮。故梁國。秦取之。更名夏陽。二漢屬左馮翊。後省焉。今入郃陽。

中白水縣。二漢衙縣地。屬左馮翊。故城在今縣東北。後省焉。元魏置白水縣。隋屬馮翊郡。唐屬同州。春秋文二年。晉侯及秦師戰于彭衙。卽此。亦漢栗邑縣地。屬左馮翊。東漢及晉皆因之。後省焉。

中韓城縣。故韓國。漢爲夏陽縣地。屬左馮翊。隋開皇十八年置韓城縣。屬馮翊郡。唐屬同州。有禹貢梁山。

詩韓奕篇。弈弈梁山。卽此。有韓原。魯僖公時。秦伯伐晉。戰于此。有龍門山。卽禹導河至于龍門也。魚集其上卽爲龍。

望華州。本鄭國。春秋時屬晉。戰國屬秦魏。秦屬內史。漢屬京兆尹。東漢屬京兆。弘農郡。晉因之。元魏置華山郡及東雍州。西魏改曰華州。隋初郡廢。大業初州廢。屬京兆。馮翊郡。唐武德元年改曰華州。垂拱二年。避武氏諱。改曰太州。神龍元年復故名。天寶元年曰華陰郡。乾寧四年升興德府。梁爲感化軍。後唐改爲鎮國軍。皇朝皇祐五年改鎮漳軍。今縣五。

上鄭縣。鄭桓公始封此。至子武公。東徙新鄭。漢屬京兆尹。後漢及晉皆因之。元魏置華山郡及東雍州。西魏改曰華州。隋屬京兆郡。唐屬華州。郭子儀其邑人也。有少華山。

望下邳縣。秦武公伐邾。取其人來。置此縣。以有上邳。故曰下邳。漢屬京兆尹。東漢屬弘農郡。晉屬馮翊郡。後置延壽郡。隋開皇初郡廢。屬馮翊郡。唐垂拱元年來屬。漢蓮勺縣。屬左馮翊。東漢及晉皆因之。隋大業初省入焉。故城在今縣東北。

望蒲城縣。西魏置。隋屬馮翊郡。唐屬同州。開元四年更名奉先。屬京兆府。天祐三年復屬同州。皇朝開寶四年復爲蒲城。天禧四年來屬。有金粟山。

緊華陰縣。禹貢華陰之地。戰國時曰陰。晉屬魏。秦得之。惠文王五年更名寧秦。漢高帝八年更名華陰。屬京兆尹。東漢及晉屬弘農郡。元魏置華山郡。隋屬京兆郡。唐屬華州。禹貢太華山在縣東。水經注云。河

水南流。潼激關山。因謂之潼關。漢末曹公西征。與韓遂馬超相持於此。
上渭南縣。漢新豐縣地。蓋苻秦時置。元魏置渭南郡。後周郡廢。隋屬京兆郡。唐因之。周顯德三年。來屬。

輿地廣記卷第十四

陝西永興軍路下

緊耀州。春秋戰國屬秦。秦屬內史。項氏分屬塞國。漢初屬河上郡。後屬左馮翊。東漢及晉皆因之。元魏置北雍州。西魏改爲宜州。及置北地郡。尋改爲通川郡。隋開皇初郡廢。大業初州廢。屬京兆郡。義寧二年置宜君郡。唐武德四年改曰宜州。正觀十七年州廢。天授二年復置宜州。大足元年又廢。天祐三年岐王李茂貞墨制置耀州。仍升義勝軍節度。梁末帝時茂貞養子溫韜以州降梁。梁改爲崇州。靜勝軍。後唐同光元年爲耀州。以爲順義軍。皇朝開寶五年爲威義軍。太平興國元年改威德軍。今縣七。

上華原縣。隋屬京兆郡。唐因之。垂拱二年改華原曰永安。神龍元年復故名。唐末李茂貞據鳳翔。僭行墨制。建爲耀州。以溫韜爲節度使。唐諸陵在其境內者悉發掘之。郭崇韜以爲刼陵賊。有土門山。

望富平縣。本漢懷德地。東漢省之。元魏置富平縣及北地郡。後周改爲中華郡。尋廢。隋屬京兆郡。唐因之。後屬耀州。有荆山。

望三原縣。漢池陽縣地。屬左馮翊。東漢因之。晉爲扶風郡治。後省焉。苻秦於畿薛山北置三原護軍。元魏罷護軍。置三原縣。後周置建忠郡。尋廢。隋屬京兆郡。唐因之。後屬耀州。

上雲陽縣。漢屬左馮翊。秦有林光宮。漢曰甘泉宮。武帝立秦時以祠太一。東漢因之。晉省焉。後復置。元魏

屬北地郡。後周置雲陽郡。隋開皇初郡廢。屬京兆郡。唐因之。後屬耀州。

上同官縣。本漢祿祊縣。屬左馮翊。東漢因之。晉省焉。苻秦於祿祊城東北銅官川置銅官護軍。元魏罷護軍。置銅官縣。屬北地郡。隋曰同官。屬京兆郡。唐因之。梁開平三年屬同州。後唐同光初屬耀州。

中美原縣。本潁陽縣。秦厲公置。在潁水之陽。漢屬左馮翊。東漢、晉、元魏皆因之。景明元年析置土門縣。隋大業初省入華原。唐咸亨二年析富平、華原、蒲城於故土門縣置美原縣。屬京兆郡。天祐三年李茂貞置鼎州。梁改爲裕州。屬順義軍節度。後不見其廢時。唐同光三年割屬耀州。

中淳化縣。本雲陽縣之梨園鎮。皇朝淳化四年置縣。屬耀州。

緊邠州。古豳國。春秋、戰國皆屬秦。秦屬內史。漢屬右扶風。安定、北地郡。漢末置新平郡。兼屬安定。晉因之。西魏置豳州。後周及隋皆因之。煬帝初州廢。屬安定。北地郡。義寧二年復置豳州。唐開元十三年以字類幽。改作邠焉。天寶三載以爲新平郡。後升爲靜難軍節度。今縣四。

望新平縣。本二漢漆縣。屬右扶風。漢末置新平郡。晉因之。後改漆縣爲白土。西魏置豳州。隋開皇四年改縣爲新平。大業初州廢。義寧二年復置。苻堅墓在此。

望宜祿縣。漢鶉觚縣地。屬北地郡。後魏置宜祿縣。以宜祿川爲名。後周省入鶉觚。屬安定郡。唐正觀二年析新平、保定、靈臺復置。屬豳州。

上三水縣。漢三水、拘邑二縣地。三水屬安定郡。東漢因之。晉省焉。後復置。西魏置恆州。尋廢。隋屬北地郡。

義寧二年屬幽州。漢之拘邑。卽故幽國。周之先公劉所居。屬右扶風。東漢因之。鄧禹遣馮愔宗歆守拘邑。二人爭權。愔遂殺歆。卽此晉省焉。故城在今縣東北。有萬壽湫。唐大曆八年。因風雷而成。

下永壽縣。唐武德二年。分新平置。神龍元年。屬雍州。唐隆元年。來屬。

上鄜州。春秋屬白翟。秦屬上郡。漢爲上郡及左馮翊。東漢屬上郡。魏武帝省焉。晉陷于戎狄。元魏置東秦州。後改爲北華州。西魏改爲敷州。隋爲鄜城郡。尋改爲上郡。唐爲鄜州。天寶元年。爲洛交郡。後升保大軍節度。今縣四。

緊洛交縣。本漢雕陰縣地。屬上郡。東漢因之。魏晉廢焉。隋開皇三年。置洛交縣。大業三年。置上郡。唐置鄜州。三川鎮。本漢翟道縣。屬左馮翊。東漢省之。苻秦於長原城置長城縣。元魏改爲三川。以華池水黑水。洛水所會爲名。隋屬上郡。唐屬鄜州。皇朝熙寧七年。省入洛交。

上洛川縣。本漢鄜縣地。元魏置洛川縣。隋屬上郡。唐屬鄜州。

上鄜城縣。昔秦文公夢黃蛇。自天下屬地。其口止於鄜衍。史敦曰。此上帝之祥。君其祠之。於是作鄜時。祭白帝焉。漢屬左馮翊。東漢省之。元魏置敷城縣。隋大業初。改爲鄜城。屬上郡。唐屬坊州。唐末。置翟州。梁改爲禧州。改鄜城曰昭化。後唐同光元年。復改爲鄜城。屬鄜州。

中下直羅縣。本漢雕陰縣地。唐武德三年。分三川。洛交。於直羅城置縣。以城枕羅川水。其川平直。故中解州。自唐以上。地理與河中府同。漢乾祐元年。割河中之聞喜。安邑。解。三縣置解州。皇朝因之。今縣三。

中解縣。春秋時謂之解梁。晉惠公因秦返國。許賂秦以河外列城五。內及解梁城。是也。漢屬河東。後漢及晉皆因之。元魏分置虞鄉縣。後省解入焉。唐武德元年。改虞鄉曰解縣。而於解西五十里別置虞鄉。皆屬河中府。漢乾祐元年。置解州。有鹽池。左傳成六年。晉人謀去故絳。諸大夫皆曰。必居郇瑕氏之地。沃饒而近鹽。是也。

望聞喜縣。本曲沃。晉文侯封其弟成師。謂之曲沃桓叔。秦改爲左邑。屬河東郡。漢武帝元鼎六年。將幸緄氏。至左邑桐鄉。聞南越破。以爲聞喜縣。東漢及晉因之。元魏置正平郡。隋屬終郡。唐屬絳州。後屬河中府。漢乾祐元年。來屬。

緊安邑縣。夏禹所都。春秋時。魏絳自魏徙此。武侯二年。城安邑。蓋增廣之耳。秦昭王二十一年。魏獻安邑。以爲河東郡。二漢及晉皆因之。元魏曰北安邑。屬河北郡。隋開皇十六年。置虞州。大業初。州廢。屬河東郡。唐屬河中府。漢乾祐元年。來屬。有鳴條陌。湯與桀戰于鳴條。卽此。有鹽池。

中府慶州。周之先不窋所居。春秋時。爲義渠之戎。秦滅之。屬北地郡。二漢因之。魏晉以後荒廢。西魏置朔州。後周廢焉。隋文帝置慶州。煬帝初置弘化郡。唐爲慶州。天寶元年。曰安化郡。至德元載。曰順化郡。升定安軍節度。後唐降之。皇朝乾德二年。復爲安化郡。今縣三。

中安化縣。本漢郁郅縣地。屬北地郡。東漢省之。後置弘化縣。隋開皇十六年。置弘州。大業初。州廢。屬弘化郡。唐爲慶州治焉。天寶元年。曰安化。至德元載。曰順化。皇朝乾德二年。復曰安化。有不窋城。同川縣。本

三泉隋義寧二年析彭原郡之彭原置唐武德三年改名同川屬慶州皇朝乾德二年省入安化

望合水縣本合川唐武德元年置是年又析置蟠交縣正觀元年省合川入弘化天寶元年更蟠交曰合水後廢焉皇朝熙寧四年復置華池鎮本西魏置蔚州後周廢之隋仁壽初置華池縣屬弘化郡唐屬慶州皇朝熙寧四年省入合水故樂蟠縣本漢略畔道屬北地郡後省焉隋義寧二年析合水置樂蟠縣略畔與樂蟠音相近故訛耳唐屬慶州皇朝熙寧四年省入合水

緊彭原縣本漢彭陽縣屬安定郡東漢因之元魏置西北地郡隋開皇初郡廢十八年改縣曰彭原屬北地郡唐武德元年置彭州正觀元年州廢屬寧州皇朝熙寧三年來屬

雄虢州春秋時爲虢之南境虢亡屬晉戰國時屬秦魏二國秦平天下爲三川郡漢屬弘農郡東漢及晉皆因之元魏置西弘農郡後周廢之隋煬帝置弘農郡恭帝改爲鳳林郡唐初置鼎州因鼎湖爲名後爲虢州今縣三

中虢略縣左傳晉惠公許賂秦伯以河外列城五東盡虢略是也漢爲弘農縣地屬弘農郡東漢及晉皆因之隋大業中自湖城縣界與郡俱徙於弘農川卽今治也唐武德元年置鼎州正觀八年廢自盧氏移虢州於此神龍初避孝敬皇帝諱改曰恆農開元十六年復故名皇朝建隆元年避廟諱改曰常農至道元年又改曰虢略玉城鎮故玉城縣西魏廢之唐屬虢州皇朝熙寧四年省入虢略

中盧氏縣漢屬弘農郡東漢因之晉屬上洛郡元魏置洛安郡西魏改爲義川郡隋開皇初郡廢置虢州

大業初州廢屬弘農郡。義寧元年復置虢郡。唐武德元年改爲虢州。正觀八年州徙治弘農。有禹貢熊耳山洛水所出。

中朱陽縣。元魏時置。兼置朱陽郡。後周郡廢。隋屬弘農郡。唐屬虢州。

望商州。商契始封於此。春秋時屬晉。戰國時屬秦。爲內史地。漢屬弘農郡。東漢屬京兆尹。晉初爲京兆南部。後置上雒郡。元魏因之。西魏兼置洛州。後周改爲商州。隋初郡廢。大業初州廢。復爲上洛郡。唐復爲商州。天寶元年曰上洛郡。今縣五。

中上洛縣。本晉地。竹書紀年。晉烈公三年。楚人伐我南鄙。至于上洛。是也。漢屬弘農郡。東漢屬京兆郡。晉泰始二年。置上洛郡。隋開皇初郡廢。大業初復置。唐爲商州。商山在縣西南。秦四皓所隱也。州界有七盤十二繞。其道隘險。王莽命王級曰。繞雷之固。南當荆楚。蓋謂此地也。有雄耳山。

中下商洛縣。古商邑。契之所封。秦以封衛鞅。號曰商君。漢屬弘農郡。東漢屬京兆尹。晉屬上洛郡。隋曰商洛。亦屬焉。唐屬商州縣。東有少習。左傳哀四年。楚司馬使謂晉陰地之大夫曰。晉楚有盟。好惡同之。不然。將通於少習。以聽命。秦謂之武關。漢高帝游酈。攻武關。以入秦。

中下洛南縣。漢上雒縣地。元魏置拒陽縣。及拒陽郡。隋開皇初郡廢。改縣爲洛南。屬上洛郡。唐屬商州。中下豐陽縣。後周置。隋屬上洛郡。唐屬商州。舊治吉川城。麟德元年移治豐陽川。

中下上津縣。漢長利縣地。屬漢中郡。宋置北上洛郡。梁改爲南洛州。西魏爲上州。隋大業初州廢。屬上洛

郡唐屬商州

望寧州夏公劉之邑。春秋時爲義渠戎國地。築城郭以自守。而秦稍蠶食之。戰國時戎王與秦昭王母宣太后亂。有二子。宣太后詐而殺戎王於甘泉。遂起兵滅義渠。始皇初屬北地郡。漢屬北地上郡。東漢屬北地安定郡。晉國之後沒于戎狄。元魏獻文置華州。孝文改曰班州。後爲豳州。西魏改爲寧州。後周分置趙興郡。隋改寧州曰豳。尋廢州。而改趙興爲北地郡。唐復爲寧州。天寶元年曰彭原郡。今縣四。

緊定安縣。漢泥陽縣地。屬北地郡。後周置趙興郡。隋開皇初郡廢。大業初置北地郡。唐爲寧州。

緊定平縣。漢泥陽縣地。唐武德二年析定安置。屬寧州。唐末置衍州。周顯德五年州廢。屬鄜州。後來屬。

上襄樂縣。漢襄洛縣也。屬上郡。元魏改洛爲樂。置襄樂郡。西魏置燕州。後周並廢。隋屬北地郡。唐屬寧州。

泥陽鎮。本泥陽縣。二漢屬北地郡。晉爲郡治。元魏復置。後省焉。

下真寧縣。漢陽周縣。屬上郡。東漢省之。後復置。西魏置顯州。後周廢焉。隋開皇中改陽周縣爲羅川。屬北

地郡。唐屬寧州。天寶元年獲玉真人像二十七。因改羅川縣爲真寧。有橋山。黃帝所葬。

上坊州。自隋以前地理與鄜州同。後周天和中元皇帝爲敷州刺史。於此地爲馬坊。武德二年分鄜州置

坊州。因故馬坊爲名。天寶元年曰中部郡。今縣二。

緊中部縣。漢翟道縣地。屬左馮翊。後秦姚興置中部縣。元魏因之。置中部郡。隋避廟諱。改曰內部。開皇中

郡廢。屬上郡。唐置坊州。有杏城。姚萇置。在今縣西。

中宜君縣。漢祿祜縣地。屬左馮翊。元魏置宜君縣。後置宜君郡。隋開皇初郡廢。屬京兆郡。唐初屬宜州。正觀二十年屬雍州。龍朔三年來屬。有玉華宮。在今縣北。唐正觀二十年置。

上丹州。春秋時爲白翟。戰國時屬秦。秦屬上郡。二漢因之。晉亂沒于戎狄。西魏置汾州及義川郡。後改州爲丹州。隋開皇初郡廢。大業初州廢。屬延安郡。義寧元年置丹陽郡。唐爲丹州。天寶元年曰咸寧郡。今縣一。

中宜川縣。本義川。西魏置義川郡。後周改縣爲丹陽。隋開皇初復爲義川。義寧元年置丹陽郡。唐爲丹州。皇朝太平興國元年改縣曰宜川。故咸寧縣。本永寧。西魏改爲太平。隋開皇中改爲咸寧。屬延安郡。唐屬丹州。皇朝太平興國三年省焉。汾川鎮。本安平縣。元魏置。後周改曰汾州。隋屬延安郡。唐屬延州。皇朝熙寧三年省入宜川。雲巖鎮。本雲巖縣。唐武德元年析義川置。屬丹州。皇朝熙寧七年省入宜川。

下環州。自元魏以上。地理與靈州同。後周置會州。隋改曰環州。以大河環曲爲名。大業初州廢。屬靈武郡。唐武德二年復置會州。正觀六年更置環州。九年州廢。還屬靈州。咸亨三年置安樂州。以居吐谷渾部落。至德後沒吐蕃。大中三年收復。更名威州。後廢焉。晉天福四年復置威州。割靈州之方渠。寧州之馬嶺。木波。三鎮爲屬。而治方渠。周廣順二年改曰環州。顯德四年廢爲通遠軍。皇朝淳化五年復爲環州。今縣一。上通遠縣。本方渠。漢屬北地郡。東漢省之。隋開皇十九年置鳴沙縣。屬靈武郡。唐置威州。晉以方渠鎮復置威州。周改爲環州。後廢州爲通遠軍。而改方渠爲通遠縣。皇朝天聖四年復改爲通遠。馬嶺鎮。本馬

領縣西漢爲北地郡治東漢徙治富平而省馬嶺焉。

下府銀州春秋爲白狄戰國屬秦後屬上郡二漢屬西河郡魏晉荒廢元魏立開光郡後周立真鄉郡兼立銀州隋開皇初二郡皆廢大業初州廢入雕陰郡唐正觀二年平梁師都立銀州天寶元年曰銀川郡唐末陷爲拓跋氏皇朝崇寧四年收復舊領縣四。

中儒林縣二漢置陰縣地屬西河郡苻秦有驄馬城土俗呼驄馬爲乞銀因號乞銀谷後周於是立銀州隋開皇三年置儒林縣大業初州廢屬雕陰郡唐復立銀州東北有無定河卽圍水也圍與銀音同而漢志作圍陰顏師古注云圍本作圓縣在圍水之陰因以爲名王莽改爲方陰則是當時已誤爲圓字今有銀州銀水卽是舊名猶存但字變耳以此考之則九域圖所載乞銀之說未可據也。

中下真鄉縣西魏置後周立真鄉郡隋開皇初郡廢後屬雕陰郡唐正觀二年來屬西北有茹盧水。

中開光縣元魏立開光郡後周因之隋開皇三年郡廢屬雕陰郡後省唐正觀二年平梁師都復置隸綏州八年隸柘州十三年州廢來屬。

中下撫寧縣西魏置隋屬雕陰郡唐初隸綏州正觀八年來屬。

同下州綏德軍春秋時爲白狄戰國時屬秦秦屬上郡漢初屬翟國後屬上郡東漢因之西魏置安樂郡兼置綏州隋開皇初郡廢大業初廢綏州而置上郡尋改爲雕陰郡唐復爲綏州末年陷于西戎皇朝熙寧二年收復廢爲綏德城屬延州後升爲軍唐治龍泉縣統縣五。

中龍泉縣。漢膚施縣地。元魏置上縣。西魏以爲安寧郡。隋爲雕陰郡。唐爲綏州。天寶元年改縣爲龍泉。漢上郡故城在縣西南。

中下延福縣。本延陵。西魏置。隋開皇中改曰延福。屬雕陰郡。唐屬綏州。

中下綏德縣。西魏置。隋屬雕陰郡。後廢之。唐武德二年復置。屬綏州。

中下城平縣。西魏置。隋屬雕陰郡。唐屬綏州。

中下大斌縣。唐武德七年置。治魏平。取稽胡懷化文武雜半以爲名。正觀二年移治今所。

同下州保安軍。自五代以上地理與延州同。皇朝太平興國二年以延州永安鎮置保安軍。統寨二。德靖寨。天禧四年置。建子城。天聖元年改爲德靖寨。

順寧寨。慶曆四年置。

